



遺民詩卷第八

寶香山人 卓爾堪

子任

吳嘉紀

賓賢野人江南泰州人
陋軒集

送王幼華歸秦

步登郭外山
佇看去輪轉
登山未及巔
去輪已遠
遠遠尚隱隱
黃塵倏隔絕
歸人望白雲
送者指明月
願為前途月
昏曉尤皎潔
一更照君宿
五更照君發

流民船

撥棹欲何之
遠投烟火處
歲儉竊盜多
村村見



遺民詩八
船怒男人坐守船呼婦行乞去蔽體無完裘蔽
身無敗絮嬌兒寘夫膝臨行復就乳生長田舍
中那解逢人訴一米一低眉淚溼東西路

糧船婦 海氏

秋風河上來吹我飢饉夫雖有如花婦不及盤
內舖日暮何誼誼河灣泊糧船船公坐上頭聆
睽見紅顏遣人通殷勤吾家衣食足若輩愁餓
死試來同力作到一年償錢令汝歸力作
到三年無錢令汝歸阿夫呼婦語與卿勉相從
不從便餓死爾我長西東匍匐起偕婦婦淚落

如雨昨日閨中人今日舟中婢儔侶聞添丁餽
酒遺捷蹄河南艤船來河北艤船來船公中心
喜舉手數斟酌自謂佳麗質已是虞羅雀羅雀
則有雄匹婦則有夫誰知匹婦志千折不可移
阿夫泣相持依人且低眉力作到三年無錢共
汝歸阿婦默無聲人眠窻落月急遽離船公慷
慨尋鬼伯抱石投邗溝波濤為不流行人揮涕
看尸橫溝水頭

寄題龔大野遺新居

亂離足飄泊老大還郊垞江水真有意流轉一

浮萍親戚復誰在虎嘯山風腥驚疑兒女色顧
戀歸人情翳翳寒烟墟蕭蕭茅草亭琴書既有
託斂跡謝逢迎澄潭入郭流羣峰繞舍青悄然
松際月聞爾商歌聲

歲暮送汪舟次遊匡廬

杳冥香爐峰高卧堪幾旬只愁雪不化不知天
地春晴霽試出戶雲物多鮮新飛泉一萬仞半
空聲粼粼解衣寘石坎滌盡人間塵

復洲田四首與老友陳鴻烈

選二

洲田復與民官長示告諭故主前來看猶疑夢

未寤落葉遇回風衰林尋舊樹寥寥亂後人歷
歷沙上去烽燧壘尚在望望生驚懼十年避兵
戈萬姓凋道路他鄉溝與壑一步一回顧
斜日寒江流褰裳試遵渚不悟餘黎民重踐舊
田土廬墓在何處四顧唯榛莽雉雞見人飛狐
狸嗥且怒生理何暇計先須蔽風雨刈草覆我
堦疊石爲我堵不復辨東西向山編竹戶室成
誰往來蘆中有漁父

送王季鴻之西泠

高堂十二月佇望車輪返浮雲入吳會誰知獨

偃蹇夜起別親人殘月照餐飯鴻鴈已北飛斗
柄亦東轉還家未有期冰霜路更遠江樹晨風
鳴徙倚心腸斷

雄雉匿深莽不知毛羽鮮君子在草野幾人識
其賢西湖春二月桃李爭芳妍觀者皆快意遊
子獨愴然此鄉雖云樂不如歸舊川毛義室有
親趙壹囊無錢莫待花落盡山山啼杜鵑

江都池烈女詩

烈女姓池吳廷望妻也未嫁廷望從
軍南征戰死其父吳某素稱里中無

賴欲以女婚次子女之父兄憚之屬
姨母語女且勸之嫁女不從自縊繩
斷者三竟縊死吾友張琬為作傳命

紀賦詩

旌旆搖野風戰馬顧羣嘶壯士志封侯不娶娉
婷妻娉婷方盛年桃花三月時三月轉盼盡征
戰返無期無端夢沙場血污泣游魂覺來信已
至夢寐竟成真招魂親剪紙涕淚濡羅巾朝為
未嫁女暮稱未亡人蝴蝶飛過牆栩栩尋春芳
安得久踟躕鬼伯隨姨孃姨孃是尊長出言何

不莊令人亂匹配人生豈牛羊烏棲城郭黑三星檐前明壁上青一燈炤耀大嚴妝生小不知路死路行最能永從黃泉伴三結朱絲繩鄰舍聞此變日出走來看從未識女面今日見容顏一枝紅桃花霜雪色尤鮮問女首何飾夫家聘時簪聘時更何物玲瓏雙耳環女意何所嚮面南身徘徊巾帶微飄揚如上望夫臺問女住何處草屋女所居草屋有此女此女天下無鴛鴦不擇水泥滓產明珠商人爭殯葬醉酒多士夫酒醉起黃沙沙場鬼還家還家徒夜遊得妻不

得侯始悲謾好勇生死滋繁憂傳戒後世人慎勿把戈矛

逋鹽錢逃至六竈河作

日傍故園落洲洲蘆花開新鴈此時至孤鳴夕悲哀我亦始離羣行坐無好懷長謠思同心道阻不可偕風末聞擢歌何人遠溯洄呼兒匿草中叱咤債主來

曠野風又起葦乾葉颼颼海岸欲下雨狼鳴五更頭衰年近異類驚定淚旋流眼中無護草何以忘我憂土室絕親愛雪窖長淹留往哲已如

此老夫復誰尤

雄雉徘徊飛羽毛何陸離孤蹤傍潮汐文采欲
奚施豈無山澤侶道遠不可追入草聊自潛尾
長人易知隨鴻苦無力變蜃非此時常愁觸羅
網顧盼心驚疑

禪智寺送王阮亭儀部

蒼惶不肯別送送多纏綿泊船尋古寺秋螢飛
野田草深去途隱處處生寒烟山僧惜離人殷
勤煮石泉今夕且歡會新月正娟娟

挽船行

疫困駕船人人船雙趵起老姑起把舵新婦為
緯夫尚存異鄉息自憎薄命軀夏日懸中天灼
死岸傍樹纏頭苦無巾裹足猶有布數罷商人
錢拭淚盼官路路長緯繩短挽船不敢緩

董嫗

客行斑竹村有嫗田間哭野曠人迹稀嫗手牽
黃犢犢口齧齧食草色莽莽綠哭聲一何悲牛
羊為躑躅客行聊駐足近前問緣由心念主人
恩欲言淚還流主人韓秀才諱默家住蕪城裏城
破兵屠戮夫妻先自死妻蕭氏縊死梁上夫溺死

井底所生兩男兒一死從嚴親

諱彥超

幼者

名在魏

母懷擊舉託老身憶母將縊時復抱幼兒乳乳
兒幾曾飽蒼惶分散去門外積骸高昏暮何西
東裏兒兒不啼共入死人中死人蓋生人尸血
模糊紅五日殺人了駱駝鳴蜀岡匍匐夜出郭
隴晴麥穗黃麥仁采餵兒烟火投村莊兒我各
無恙田夫歎且驚今年麥穗黃明年麥穗黃兒
儵稱郎君軀體如父長眉宇尤骯髒落筆善文
詞往來多益友稍欲大門楣郎君今安在書劍
燕山陞燕山三千里懷思斷肝腸語罷辭客去

倚犢向北望北路驢馬來飛動遙相呼郎君不
捨我今日歸來乎謬謬弗自知但怪無人應鳥
雀返墟落烟寒樹色暝客亦掩耳歸嫗聲難再
聽

王解子夫婦

如臯王解子酷嗜酒里有義士妻某
氏臯當遣戍縣官差役往送解子與
焉歸悲惋終夜為之罷飲其婦詢知
願以身代義士妻解子許之送至戍
所值鄉人以金贖義士妻還不知其

道民詩八
為解子婦也姚潛為余言命余賦詩
張羅待黃鵠鴛鴦乃罹咎義士妻遣戍解子罷
飲酒慘愴還家門色驚糟糠婦漿醞寄性命今
何不入口問訊執壺前解子起搖手汝曹婦女
流中懷豈堪語若欲知其繇汝且將壺去漿醞
非刀劍能平不平事汝亟將壺去義士妻遣戍
其婦毅然謂堂堂義士妻此去為奴婢羞辱儂
念之面貌外不識他人可代伊何人可代伊搔
頭惱阿公公也無庸惱願代者是儂解子得聞
之歡喜涕還隨汝曹儻如此我拜汝曹坐未明

肩輿出曉至官衙裹鞴鞍遣戍人點名及解子
銀鐙繫馬上戈挺荷馬前意氣火伴中寧知路
險艱蕭森北林樹黠黠黃河烟蘆葦隱漁火宿
鴈雙雙鳴回首睽鄉土夫婦欲何言月落別黃
河日出見戍樓來日關塞外永辭我故夫高情
生惻怛淚下如連珠無端故里客邂逅他鄉陌
深悲義士妻遽解黃金贖仁義感道路見者欣
相告誰知有匹偶天暗全骨肉西風吹歸騎東
臯指茅屋解子婦言旋義士妻免辱團團臺上
鏡皎皎匱中玉解子樂何如滿引杯中綠

義鶴行

山寺高塵市遙暄如兩鶴來為巢巢成子生翼
憊神勞十日雨漲海水遠去覓食笑殺村豎攀
曳上寺潛以鵝卵易其子卵破子出雌鶴待飼
子出形殊雄鶴驚呼飛飛色怒疑雌暗私他羽
東西南北徧告同類去日瘦北風悲同類四面
來瞋目厲喙且視且猜無端紛紛逼迫俄頃天
窄地促可憐雌也潔如玉懷不得明義不受辱
啄爛巢中雛自挂山頭木雄見雌死轉嗔為啼
同類無賴各返南北東西踽踽癯癯夜永孤棲

栖遲到曙月落梧檟同類復來聚僧厦率一雌
鶴乃是新寡雄不顧去四野終身不雙以報泉
下

隄上行

岬傍婦如花枝不粧首飾髻低垂達官大賈盡
船近長跪欲告腸中飢舉頭不覺雙淚隨隔河
望見露筋祠露筋烈女也

東家行

壬寅六月揚州事

東家錢多高興發娶婦無端當六月婦家愛女
竟不辭楚練齊紈日夜治治成衣裳粧次第上

遺民詩八
九
着六層下着四綿綿纏纏直到老風俗舊例重
綿襖一事違俗恐弗吉阿母不肯織毫少女兒
低頭泣無言擁入繡輿簫鼓喧眼見新人就火
掘安能忍死到夫門夫家賓客實華屋爐燃松
焰几燒燭到處骨肉皆鬼伯忍將餘生相迫促
有生歡樂轉成悲始悔炎天作事非裹尸更不
需繒帛送嫁衣爲送死衣

隄決

田桑溪柳棲野鷄洪水西來崩我隄村村稻苗
今安在川飛湖倒接大海盡說小船值萬錢誰

知楫短不能前一浪打人水半船

今日隨人去築隄明日隨人去守隄颶風靈霖
無休息土溼泥流積不得杖藜登高看水長東
舍西鄰白泱泱蝦蟇入門坐蘋上

暮年辛苦飼孤孫黃口命倚白頭存餅餌斷絕
已兩日水中走來抱我膝鶯鶯天上嗚嗷嗷歎
息汝祖非其曹不得銜汝出波濤

李家娘

乙酉夏兵陷郡城李氏婦被掠掠者
百計求近不屈越七日夜聞其夫歿

婦哀號撞壁顛碎腦出而死時掠者
他出歸乃怒裂婦屍剖腹取心肺示
人見者莫不驚悼咸稱李家娘云

城中山白死人骨城外水赤死人血殺人一百
四十萬新城舊城內有幾人活解一妻方對鏡夫

已隋首腥刀入箭紅顏隨走西家女東家婦如
花李家孃亦落強梁手解二手牽拽語兜離笳吹

團團日低歸擁曼睩蛾眉獨有李家孃不入穹

廬棲

解三

豈無利刃斷人肌膚轉嗔為悅心念彼

姝彼姝孔多容貌不如他

解四

豈是貪生夫子昨

分散未知存與亡女伴何好髮澤衣香甘言來

勸李家孃

解五

李家孃腸崩摧篋撻磨滅珠玉成

灰愁思結衣帶千結萬結解不開

解六

李家孃坐

軍中夜深起望不見故夫子唯聞戰馬嘶悲風

又見邗溝月清輝漾漾明心胸

解七

令下止殺殘

人生寨外人來殊似舅聲云我故夫子身沒亂

刀兵慟仆厚地哀號蒼旻

解八

夫既歿妻復何求

腦髓與壁心肺與讐不嫌剖腹截頭俾觀者殼

鯁若羊牛

解九

若羊若牛何人東家婦西家女來

日撤營北去馳驅辛苦鴻鵠飛上天兔兔不離

土鄉園田憶李家孃明駝背上淚如雨

十解

秦潼

秦潼水霧中屋上棲野鴨蘋花蓮葉遍里巷野
鴨飛下爭唼喋有船田婦皆為漁十口五口依
菰蒲蒲多村少心腸亂網得大魚無米換亭午
風順客船來烟生茅店人炊爨可憐冷落紅顏
婦凶年賣飯不賣酒

白塔河

朝發黃金壩暮宿白塔河河流上河泥土沃夏
收麥菽秋登禾人家隱隱暮春遠楊柳脩脩燈

火多咫尺下河沒洪水哭聲水聲一千里上河
農厭下河哭船來繫樹遭驅逐同是耕田鑿井
人何惜樹陰不借宿

七歌

嗟哉我父逝不還一棺常寄他人田田中水闊
波浪白渚禽夜叫聲淒然敝廬去此地幾尺陌
阡經歲無人跡父在曠野兒在室淚眼望望終
何益北邙土貴黃金少毛髮鬢髮兒已老世人
賤老更羞貧寸草有心向誰道嗚呼一歌兮歌
音淒乳鴉聲苦山月低

嘗見里人稱母壽杖淚卽思我慈母慈母謝世
值饑年棺衾草草何曾厚我昔抱疴母在時千
里就醫不相離謂兒形容一何瘦涕洟落入手
中糜只今災荒生計拙茅檐卧病對風雪昔日
食中母淚多今日病裏晨炊絕嗚呼二歌兮歌
辛酸孤身無倚海天寬

叔兄昏夜行閭里突遇惡少椎擊死前代之冤
今不理嗚呼伯兄慟不起伯兄一櫬羈南莊叔
兄一櫬州城傍兩兄白骨亦難聚安望死生同
一鄉我兄我兄昔有四出門入門今少二海內

誰爲擊筑人懷裏空存不平事嗚呼三歌兮淚
縱橫寶刀爲我牀頭鳴

寒鴉偏叫四兄室四十獨宿到五十中夜擁絮
身苦醒不恨日出恨月出仲兄垂老更多疾歲
儉門衰千慮集黃金錯買里人田白頭難覓忘
憂術幾人索逋幾催科中庭雜沓無虛日嗚呼
四歌兮歌未央失羣飛鴈不成行

夫沒三月兒出腹我妹心苦無人告四體飢困
不得乳兒哭母哭聲滿屋絳績一日得十錢手
作口哺到三年昨夜燈前初學語向舅呼爺音

楚楚兒語翻令阿母悲急掩兒口淚如雨嗚呼
五歌兮雨霏霏孤燕將雛何處飛

朝尋道人夜臺去王劍為僧身亦死故鄉三益
存者誰樊上荷鋤王仲子仲子學稼我問津欲
訪江南舊酒人賃春賣卜各鄉縣天下英雄受
貧賤慘澹關河落日微眼昏髮短幾相見嗚呼
六歌兮歌唏噓篋中空滿知交書

夙昔常輕萬里途出門大路成江湖波濤洶湧
魚龍亂車輪馬足胡為乎逡巡持斧采枯木雪
花倒落叫鴻鵠歸來飢子牽衣啼爨下有薪甑

無粟谿友網得尺半鱗就余沽酒言苦辛下山
晨月去如水時不再至徒傷神嗚呼七歌兮終
惆悵志士顏衰心益壯

東山送程川伯

東山泉鳴山巔落石穿巖幾千仞一山草木顏
色鮮潺湲直到農夫田田中水白鴛鴦飛綠頭
紅掌鴨兒肥秣花香裏主人歸

海潮歎

颶風激潮潮怒來高如雲山聲似雷泐海人家
數千里雞犬草木同時死南場屍漂北場路一

半先隨落潮去產業蕩盡水烟深陰雨颯颯鬼
號呼隄邊幾人魂乍醒只愁徵課促殘生斂錢
隋淚送總催代往運司陳此情總催醉飽入官
舍身作難民泣階下述異告災誰見憐體肥反
遭官長罵

灣港謠

郎刺船儂夜炊飯熟共郎食未畢船頭已見飛
鷺鷺鷺鷺飛飛下啄蚌水大船輕到灣港樹鳴
東淘雞海黑三塘岬來到灣港程一半

我昔五首效袁景文

我昔客途逢敗兵弓絃旆影風秋鳴殘騎如狼
散草莽居人雜兔奔縱橫漁船貪利夜賣渡金
大乃許載人去暝色潛行曙則隱口乾腸飢我
能忍

我昔攜家亟逃難海雲霍霍晝昏宴野空蹄響
賊馬近我船欲速行轉慢須臾燔燒閭里紅風
漂船入蘆港中蘆葉菰葉蔽男婦引衣掩塞啼
兒口

我昔避亂走三夜蕪塍倦魂碧藉藉道路梗塞
不得前莫莊寺外儻草舍半間草舍日百錢夜

遺民詩八
五
傍主人雞彘眠壁隙臭蟲餅俟血齧人不待繁
火滅

我昔兵過獨還家畦上觸體多似瓜鴨毛滿蹊
舊狗死籬菊自放霜中花天南伯兄天北季驚
魂棄絕故園地又聞土賊聚稍稍細雨夜啼九
頭鳥

我昔有鄰怒開扉

崔省之

提刀堰東入重圍手誅

羣賊氣力盡身委萬鋒肌肉飛頭兒聚馬觀好
漢相誠勿近虎墩畔虎墩燈火秋樹間妻妾夜
望丈人還

送瑤兒

瑤兒余長子大年也丙辰孟冬病歿
里中舊俗歿之三日家人隨親戚攜
酒治饌設魂車焚祀里門外謂之餞
程余欲往里老謂父不可以送子余
徘徊門欄登高而望以老眼送之作
送瑤兒詩

送瑤兒出門闌門外生死別行人駐足觀鬼馬
在後仙幢在前胡僧偏袒搖掌導魂鈴子聲錚
然鄰挈酷友炙膳汝黃口兩兒大者執梨粟乳

媪襁負之里門瑤兒里門臨河湄中流無梁舟
楫稀楚天西漏淮水東飛蛟鯨掀翻崩湍怒彭
咸窟宅何可依瑤兒里右荒丘枯白楊枝上妖
禽啼夜霜魚鹽死客子骸骼寄此鄉年年寒食
無祭祀羈困之鬼難與相羊袖中糗糲汝母寘
未許分作他人糧瑤兒恂怛焉之曠野悲風埃
色黯蔚長牙闊口利爪敦背來往豺狼狒病後
汝力微生前汝膽細彼伺人者佻佻欲前寧不
畏郊原四顧多險艱魂兮杳渺不知還擊鼓吹
簫促命駕靈輻彷彿雲烟間雲烟見老父將去

仍緩緩老父眼睫血淚滿夜臺汝夢長人世吾
日短落暉躑躅掩嗞嚙送瑤兒心腸斷

落葉

枝上曾幾日夜來秋已終又隨天地意亂下戶
庭中不靜月斜處偏驚頭白翁何須怨搖落多
事是春風

水退後同戴岳子晚步因過季園時季

秋九日

水中微徑出沙石白粼粼枯柳不棲鳥空亭始
受人東淘漁火聚西寺磬聲新吹帽風何急蕭

蕭落葉頻

新僕

語少身初賤，魂傷家驟離。
饑寒今已免，力役竟忘疲。
前輩親難愜，新名答尚疑。
猶然是人子，過小莫愁笞。

九日同夏次公作

風雨朝如晦，乾坤日用兵。
秋魂聽鬼哭，老眼看人爭。
榛梗方為害，東南稍輟耕。
吾家二十口，溝壑正關情。

初冬

海桑還落葉，田舍始休農。
暖日窮人得，行雲老鴈從。
地偏欣事少，廬敞畏鄰春。
歲月跼蹐過，中原正舉烽。

寄程蝕菴

練江巖岫內，沙白葦蕭蕭。
鶴髮浮孤艇，漁竿閱兩朝。
嶺雲流作瀑，澗樹側為橋。
不得來攜手，思君顏色凋。

途中贈吳子遠

雪止川原合，茫茫中夜情。
倦身臨岸側，僵足揣途行。
渚凍鴈難下，村光雞易鳴。
三塘桑柳近，僮

僕計歸程

送吳冠五還屯谿

客路夕陽低逢君歸舊溪狂歌杯共把無意手
重攜石澗清人影晴沙健馬蹄回頭看蕩子皓
首獨栖栖

顧友惺畫萱花見贈

遲暮隨飄梗荒蕪歎故丘徑花常入夢罇酒不
忘憂有客來蝸舍題名是虎頭一枝圖贈我風
露晚悠悠

泊船觀音門十首

征南十萬卒如蟻泊歸舟懸旆纏雲脚悲笳裂
石頭清平他日夢行旅夕陽愁亡國恨無盡滔
滔江水流

磯上誰長嘯蒼然老匹夫江山六朝在天水一
亭孤禿樹翔歸鷺層濤捲亂鳧漁舟安穩甚吹
笛入菰蒲

鍾阜雲何似吳陵客重來松杉焚已盡鸛鶴暮
空回特特高原立頻頻倦眼開東風吹不歇草
色出寒灰

卽以山爲郭堅完世所稀雲鴻應得度塞馬竟

遺月詩八
十九
如歸隴雨耕時大人烟戰後微年年禾與黍養
得駱駝肥

江路倏昏黑狂風吹倒人怒潮奔上岸小艇泊
無鄰何事歌彈鋏惟應把釣緝深深建業水欲
飲轉傷神

兵火猶存寺乾坤未息戈前朝寄何物古樹指
娑羅陰冷山僧坐花香水鳥多盤桓吾不厭一
日幾回過

鼓鼙聲颯颯道路色淒淒盤髻婦馳馬橫刀兵
捉雞山城常罷市帝里已成畦黃屋光輝瓦紛

紛碎入泥

寒潮看又落漸漸見山根拾蚌澗沙軟打魚江
水渾饑民春滿路米店晝關門吾亦餬吾口愁
來只自言

短褐張道士

張瑤星

長安舊錦衣饑眠紫峰閣老

掩白雲扉塵世鹿還逐鼎湖龍不歸時時一回
首血淚盡情揮

高情憶吳季

吳介

小築面秦淮書帙集連屋蘭

花開上階看人澆菜圃邀我到茅齋山色在門
外春風多好懷

內人生日

潦倒丘園二十秋親炊葵藿慰余愁絕無暇日
臨青鏡頻過凶年到白頭海氣荒涼門有燕谿
光搖蕩屋如舟不能沽酒持相祝依舊歸來向
爾謀

贈歌者

戰馬悲笳秋颯然邊關調起綠樽前一從此曲
中原奏老淚霑衣二十年

呂

潛半隱四川遂寧人
懷歸草堂詩集

送友蒼大師住水西

瓢笠歎無定名山久待公雪殘春路滑雲過晚
江空道力馴巖虎鄉心折塞鴻還憎多慧業詩
句滿南中

秋水園即事

近午過重溪亭空春草齊幾家圍市小一寺背
山低花隱漁人路香留燕子泥前賢遺澤在五
夜尚聞雞

道峰叅木和尚用胡將軍韻

寺隱鐘先出林花照客顏師來新杖履人重舊
溪山冥壑神魚舞芳臯野馬閒何當分半榻蘿

徑許重攀

邗江夏夜懷史赤豹蕭寺

飛鳥不知處孤城生暮雲吟邊誰最苦鐘畔爾
先聞月冷空王閣風號故相墳蜀岡有歸路吾
亦戀斜曛

江陰晤年友張四若志感

二十年前別重逢白髮生登堂如有淚對面各
無聲多難惟存骨居貧不墮名天涯兄弟少淒
絕動江城

夜登君山

日與山相對追涼上晚磯月沉江樹暗風急浦
燈微舊壘逢僧指荒祠到客稀登臨期更盡徐
趨野螢歸

大水渡泗州

浩浩春濤潤孤城一葉浮烟塵淮水暮風雨泗
陵秋戍壘存官渡原田縱客舟年年涉江渚愁
絕此中流

登開元塔

北宋築以望契
丹一名料敵塔

漠漠河山盡朔州紺宮曾與作邊籌驚看白日
憑飛屨絕少黃塵到敝裘唐世何人分鴈塞宋

家此地割鴻溝

州有唐城宋與遼分界處

于今北望休乘嶂獨

寄征人萬里愁

石亭寺樓與友人話舊

江濤如雪亂飛鴉客裏逢人漫憶家
杜宇叫殘巫峽夢鷓鴣聲斷嶺南花
天涯寄食無耕土世外藏名有釣車
試看滕王遺蹟盡西山空對晚烟斜

上谷感懷

先司馬以崇禎癸未春總督保陽距今三十四年矣重到賦此

趨庭猶記少年遊大纛威名易世留
上谷峰沉青海月中原魂斷白雲秋
麒麟卧宿三川草蝴蝶

蝶驚回八渡溝華表不歸遺老盡
斜陽立馬淚難收

江望

同舍弟長在賦

橫江閣外數帆檣立盡西風鬢漸霜
只有鄉心不東去早隨烟月上瞿塘

俞南史

無殊江南吳江人

遊玄墓因禮三峰禪師塔院

暮春招我友輕帆遠相屬谿盡未即登
捨舟遂遵陸憇蔭稍遲留一覽契遐矚
鐘聲杳靄間流映春山綠徑僻步紆回
空香沾草木紺宇插松

顛花宮掩深曲入門器盍嚴瞻禮威儀肅高下
隨所構長廊遞相續水色湛虛明幽林隱清馥
惜哉創者難遺影空堂宿靜念有餘思躊躕下
山麓

同顧茂倫宿石湖田舍

行經石湖濱日莫晦平陸蒼茫不可涉艤舟進
谿曲田家聞客來邀入茅茨宿土壁縣篝燈廚
下新炊熟老翁酒欲醺談言少拘束識字雖不
深課耕兼課讀菑畝廢已盡不憂胥吏酷聊租
他人田足以給餽粥雞犬靜無譁如親古風俗

還當鸞山田移家傍鄰屋

凝青軒對月小酌二首

軒敞不能寐清秋動幽懷一壺不獨酌為覓南
鄰偕牕虛納厓月泉清漾苔階笙簧奏林籟鼓
吹喧池蛙何用絲竹音愛此景物佳言笑多所
娛胡為憂寡諧

月上鄧尉峰照此牕中人牕中何所有尊酒聊
自陳所喜親串至談笑無雜賓涼飈落庭戶肅
然秋氣生莎雞鳴草間嚶嚶動我情故物豈堪
憶對景還自斟

月夜懷于息菴

古道沉淪日交情君獨深忽逢明月照如見故
人心秋入庭前樹泉鳴石上琴廓然天宇淨四
顧少知音

鄧尉山居十二詠

選一

蘆葦蕭蕭響輒聞芰荷香動片帆分雙橋夜鎖
千峰雨孤嶼朝連萬頃雲遠泛漁歌移柳岬清
翻月渚亂波紋好教放艇中流去把醖閒隨鷗
鷺羣

長門怨

金屋春深早閉門平陽歌舞動黃昏君王那得
如明鏡日向粧臺照淚痕

夏日胥江旅舍

渡頭風色起悲號水氣生涼百丈高為寫胸中
不平事倚樓時聽伍胥濤

姜

梗

鐵夫浙江會稽人
曹山草堂詩

同友人登曹山途中寓目

晴雪停陰岡玄雲凝雨霰散步歷層冰攜友陟
危巘猿狄向路啼藤蘿閉深院白石照清溪寒
色明空練古道架危屋椽題尚繪絢傾圮廢不

理昔人寄歡宴遺碑摧為石墓道衆人佃黃金
築臺榭感人時節變槭槭華葉凋蕭藿荒堂殿
嗟嗟日行邁誰得固平善

自京口驛達金陵悵然有述

潮落天已暮江中有孤嶼疎星林表動明月海
間吐燈火散在渚更有蛟龍舞羣籟絕爭囂山
寺陳鐘鼓杳杳志萬里鬱鬱羈愁苦依依思古
人渺渺不得語

立冬日寓石埭縣齋作

遠道杳無際迢迢在吳越楚山間夜猿淮南木

盡脫客子坐寒更聞人弔霜月經春秋復窮尺
書兩斷絕

對雪吟

去歲京師雪三尺畫簾人醉江樓笛今歲江南
三日雪竹燈孤館青烟結人生幾何東復西五
更衾冷聽雞啼

大雪詞

城中斗米錢一百雞豚塞巷木棉白徵租下令
雷霆急老父賣兒街上立老嫗關門掩面哭冬
青樹倒壓破屋

贈江上老人潘止菴

柴門不正短籬斜夜來微雨開桃花東風卷簾
老人笑舊年芍藥添紅芽江鷗過庭水鳥鳴竹
爐茗椀香正清
江郭村南十畝田佃丁逃竄無租錢新穀秋來
無一粒縣中長吏催科急野菜作羹豆作粥諸
兒書聲出破屋

相府蓮

淶水映蓮華馬蹄不動路平沙白壁堂開丞相
家重門不啓啼早鴉門前人來埽曙霞隱隱軋

軋駐羽車嗒嗒鼓吏鼓三搗望塵羅拜登仙槎
嗚呼大丈夫生不五鼎烹死當五鼎食性豈徒
勞州郡職仰面從人借顏色君不見范睢一言
傾蔡澤富貴自取非人力平生所輕程不識

登北城

寒鴈碧天清晚登郡北城霜笳吹不斷白髮自
然生海戍黃雲起津亭落日明新軍初戰罷日
夜有啼聲

過揚州次淮陰懷陶二惕董五昊

最憶春風舊酒徒高天風露逐征途王孫漂母

空祠廟古柏蒼松聽鷓鴣日落潮生京口驛雲
開月上射陽湖中流岸幘徘徊久酒滿江船興
不孤

怨詩

江南望江北綠樹徧紅霞日暮愁還起風吹枳
橈花

江北望江南桃開花復李却見日長時空梁歸
燕子

顧夢麟

麟士別號織簾居士江南太倉人

盜警言詩和陳確菴

此生不死百事錯燒煮何妨到琴鶴舉世從知
付倒顛赤丸不忤青瑣忤我昔交遊滿四方一
貧固守惟空囊冬寒月黑有底急坐煩豪客來
張皇膾肝塗腦紛紛裏白日黃塵亦如此數口
飢寒豈足云一身之內猶糠粃嗟哉生年誰滿
百安用兒孫作磐石孟生破甑去不顧此意却
待林宗識武陵聞有避秦人吾亦前身黃道真
尚擬携詩買村酒桃花深處訪遺民

虎丘坐月

何年從海湧塔勢在高峰光浸寺心月影來崖

上松千人但歌管一石有機鋒不信寒山近君
聽夜半鐘

劍池

百尺蒼涼浸石扉斗間夜夜湛餘輝龍泉便是
池中水不遇風胡見却稀

生公講堂

臺上天花散落頻風來吹萎不吹新誰言身後
空堂閉自有笙歌占斷春

舟過虎丘

白堤斜日柳垂灣花氣烟容艷澹間正愛風微

舟到緩看山情在未登山

李

潛啓美江南興化人

銀山晚觀江景

銀山重駐足興至晚登樓月影沉無際天光停
不流鼓鐘喧梵寺烟火盛瓜州颯颯悲風起方
知客路愁

宿清涼寺

人靜僧初定山孤月半啣石苔侵曲几松雪點
危巖座上花宜散堦前草莫芟興來登北阜目
送大江帆

訪友不遇

乘暇尋芳徑行行幾問津黃鸝聲在遠綠樹影
隨身入院花無主披帷榻有塵夕陽嗟獨返小
酌就西鄰

魏

禮

和公季子江西寧都人

上灘謠

內俱
難名

鷓鴣不啄魚鷓鴣不生子魚子不生鷓鴣不死
水為箭石為弓上灘多辛苦灘頭多大風將軍
大旗高接天馬船裝馬日十千

偶然作

折臂而成醫乃知公叔賢于時獨踟躕落日
渠邊課僮瀦行潦輕流正涓涓惟有清秋風吟
我意嬋媛

獨立發萬端南望何亭亭山鳥時來歸載飛還
載鳴日莫倚秋風慷慨不能平天宇一寥濶萬
里凌孤鷹

山居面石壁日月去我早奄息逝年華自顧何
草草人生會有處鳥飛魚在沼如何俯仰間惻
惻滿懷抱

良友日離析懷來徒自知復有行旅客走食章

水湄慙我遠古人沉吟發內思隱隱見天末時
有鴻鴈飛

樹荻不樹葭好蜂而惡蠅我欲規小池栽芡不
栽菱聞有變晝草焚之獲予情葵藿汝何知乃
能向日傾

輕陰衆類寂狙狽到我門園蔬力澆灌攫苗絕
其根秋風令人老天南正氤氳唐有孫供奉不
敢憎王孫

黃巢磯

黃巢敗
兵處也

黃巢毒天下萬里無人烟以此蝕唐祚五季相

因緣過汝敗兵處詈汝亦汝憐猛獸結山穴百
蟲受命焉汝一徒手人號召若湧川巍巍九州
資所至無完堅是爲作亂人其才本于天倘得
用之宜豈不成豪賢哀彼乘時子力弱如蟲蠕
投以問逝水我論亦徒然

進峽

深雲閉峽門牽舟破雲隙束水歸安流劃天光
偏側散石各爲巒聚風一有力雨立同我友雲
烟轉胸腋衣溼不知寒左顧恐右失側身聳幽
怪微細目所索綴苔沿異形黃草點蒼石當中

飛來寺丹樓鎖天極梁武曠為政而有浮屠僻
志意發妖祥土木生羽翼終于臺城圍宮苔徒
自食

出峽

風聲似鳴雷人聲如拒敵水聲沓澎湃急流觸
峽石石齒來齧船篙迸婦子力遙窺牽纜人倒
身復曲脊作勢使聲雌欲南還卻北風催骨髓
寒我尚安枕席乃眄昨宿處相距不咫尺

贈淮安張天中

君子受譽如受毀豪傑報恩如報讐丈夫磊落

不得意吹燈夜起看吳鉤淮陰市上日當午茶
亭酒肆喧歌舞不見當時惡少年何論進食老
漂母天中意氣成春雲于我如逢異地親樓上
鐘聲對曉色門前荒草共黃昏輕舟自過燕齊
水長河濁浪勢千里秦梁不去空南來敝衣短
髮見吾子

贈孫無言歸黃山

我聞黃山草木竒孫子先歸勞我思孫子後歸
須我來我將敷衽以陳詞請于黃帝一問之
黃山以黃
帝得
名
何謂垂衣裳而天下治伶倫作律歟太和

何愆陽沍陰多乖夫天時隸首之筭多寡短長
使後人不知大撓之甲子而空繫乎干支容成
作曆闕閏以爲疑賢哲貞疾以弗瘳奚尚進岐
伯而問醫諱曰黃帝旣興涿鹿之師何至今天
象留蚩尤之旗問首山之鼎何在借我併烹戴
地之四鰲奉佐帝卮我欲擘東西南北天之龍
鬚佩烏號以爲儀帝曰予旣乘元御乎太虛予
裔子孫作君作師如大海之魚不可麗拘汝奚
喋喋以聒予孫子聞之攘臂捋鬚踞椒而軒渠
春杪經翠微道上

獨自出西郭山花無數新空香飛磴路野色點
江村原上風雷合天中晴雨分不知雞犬近遂
已到柴門

偶題

天際有飛鳥林泉寘我身南風新草合落日大
川分近水細非雨遠嵐輕似雲坐來無一事還
起望前村

海淀

李皇親
舊園

但見頽垣在猶聞繞徑香藕花知舊恨茭草滿
橫塘石落洞門閉畦寬稻葉長紛紛歌舞日種

得此淒涼

燕邸偶作

遠望當歸去還登何處樓連陰只似夢見月始
多愁飢鳥寒仍出浮雲暮欲收看看燈火夜門
掩一庭秋

西行道上

河南紆道至再渡及關門雨打韓王國烏啼張
相墳白楊風自戰古廟日多昏秦楚讐皆報何
妨廢作村

計南陽

子山江南華亭人

中嶽廟

漢家牲玉走神祇中嶽巍然帝者祠一自咸陽
三月火長留松柏萬年枝香烟晝靜飄清磬風
雨春深偃翠旗尚有芝房通羽仗不妨瞻拜一
棲遲

談允謙

長益江南丹徒人
樹護草堂集

阻風逢漁者

人生不得志遂為物所欺三日舟莫進我阻鑿
江湄東風連夕吼日午勢未衰漁父漸相習引
我至茅茨酌我以春酒烹魚摘園葵誤問其姓

字欲語還遲遲聞客道今昔却憎多嗟唏自起
曬網罟呼兒收緝絲亂世多隱士漁釣難盡知

三月晦聞鴈

朱鳥怨春陽歸途尚渺茫幾時離嶽麓何日下
瀟湘道路盡風雨江湖鮮稻梁豈因兵燹隔留
滯在炎方

太白酒樓

那復存詩思安能上酒樓無干斯世事真與古
人游魯甸雲猶合齊州雨未收有情如濟水日
夕向南流

臨江柑園

臨晚蕭灘上柑園向水開黃從入霜後香自過
江來日望湘雲至今疑峽雨回徘徊不能去誰
識楚臣哀

滕王閣故址

高閣臨流付劫灰重游難問舊歌臺鋤蘭日見
佳人去芳草何年帝子回南浦鷺鷗隨浪沒西
山風雨過城來多情今夜章江水吹盡殘雲月
又開

登報恩塔

曳履星辰舊帝都且攜劍佩上浮屠冥冥元氣
西連楚歷歷諸峰東控吳拔地一呼收月魄近
天雙手拊雲膚兵戎劫火經多歲高問罡風吹
盡無

如將騁望陟山椒抒嘯寧辭登頓勞香霧怒飛
青鳳舉松濤狂吼碧虬高吳天草綠愁無盡楚
澁烟深怨未銷屢喚六朝人不醒空教鈴鐸語
秋霄

邊關春晚曲

馬上盧姬酪滿餅風沙千里走龍庭停鞭借問

江南客却道如何是踏青
盧姬隊隊弄胡琴酒滴醺酥取次斟花柳旣無
鶯燕少總然春去不關心

程

邃

穆倩垢區江南歙縣人
蕭然吟

過訪萬年少隰西草堂

值得漁夫棹江梅隱雪津黃河水腹厚白草馬
蹄春旣釋隆中業還爲川上人友生難解事往
行不須論

半塘過吳駿公

潭曲寒花路牽船荒草洲相逢百戰後昔別大

江秋城郭千年鶴
漁竿下澤表西風
眷搖落歌
歎日來遊

張

穆

穆之廣東南海人

元夜過魏和公旅邸明發有瓊海之別
眷言同意氣離合便相關良夜不重得遊人難
久閒明燈寒共影濁酒煖開顏此地能長聚菰
蒲別世間

唐允甲

祖命山茨江南宣城人
耕塢山人詩集

還山詩

抽簪謝翰侶言返故山廬涼颼起河梁黃塵蔽

征襦僕夫理前綏逝駟鳴堦除昔為同林鳥今
當天一隅豈不念巢壘風雨漂奚鷓親疎日相
屬願言惜居諸

矯矯雲中鵠矢志臨高岡上與鸞鳳友鸞鷲相
翱翔天宇何晶晶噦啗求其皇一旦陰雲集矰
網彌八荒鴟鴞恣搏攫羽苞咸摧戕同儔欣有
託焉能復孤顏哀鳴自南還戢翼棲山梁

題朱石者半水園次李梅公韻

窈窕僊源何處尋藍田花雨抱雲深相招勝侶
馴蒼鶴獨浣煩襟對遠岑灌木夏涼千樹夕芟

荷秋老一池陰滄浪欲洗羅浮夢物外閒心恣
短吟

楊禹甸

甸之江南溧陽人

絕句

粵東作

男兒識得忠義字惜死偷生良足悲懷抱丹心
投碧水免教塵污好鬚眉

趙士喆

伯濬山東萊州人

海上望田橫島

海波原不定因風始激成望中無數島只著一
田橫

錢

滙

季水江南江寧人

伴鶴亭咏梅

不逐流雲過短牆一丘一壑老寒荒商山留得
遺文古雪海移來苦節芳漠漠開敷誰比類疎
疎偃側自生光登臺彌望千端集長共幽人賦
履霜

余增遠

日新浙江山陰人

雪夜呂半隱太常談蜀中遺事

雪壓醮樓濕鼓聲聽談遺事淚縱橫蔓延誰釀
黃巾賊烏合人空白帝城莫謂彈丸拋墨子且

將孤注擲神京從來朋黨能貽禍可恨羣儒多
倒行

杜退思將歸楚賦送

春風春水太無情杜子無家問去程黃鵠磯頭
斜照下斷腸玉笛武昌城

陶

澂

季深一字季江南寶應人
湖邊草堂集舟車集

遊香巖寺

曲陽縣北
六十里

取適向林麓漸聞花氣香沮洳細路側宛轉臨
春陽諸峰紛來前杖策依重岡俯視見虎跡殷
憂何能忘同懷二三人爲我攜酒漿念茲最初

地努力風磴長

披榛造幽微轉側信險絕天風振衣袂陰磴依
冰雪苔生佛堂下淨影映眉睫山僧歸無期晨
夕梵唄缺吁嗟末法法象教殊未滅何人開溟
蒙特具廣長舌

汎舟經岳陽長沙效西崑體

春江北流日西匿繫景割波留不得道旁赤岸
今爲墟霸業何人更相憶昨宵峽雨來自東巴
陵遠樹烟空濛湘娥染黛幾千歲朝暮只臨明
鏡中柳生井邊沒芳草依然昔日相逢道音沉

響逝天茫茫愁見白波吹浩漾船旗不定南風
旋寂寞一聲聞杜鵑
黃蘆岸側黃陵下雨溼天低水交瀉靈旗暗逐
往來風人間那識蒼梧野傾心奉君無二心撫
絃斷絕悲人琴相望不盡淚中血零落可知湘
水深湘東更有蒙讒客憔悴千年滯冤魄

寒星搖搖天上明迴環下應十二城洞陽石乳
皆雲英有人餌之蹈日行日邊淵旋城下水可
憐蕩景春山是嶽靈南去千萬里青霞一片飛
初起舊寺銷亡今幾年螺書秘記鴻濛篇陰蟲

古苔蝕不盡六丁夜護蛟龍纏箬篔谷口雲氣
鮮此中歲月容高眠

登恒山

縣西北百四十
里曰大茂山

恒陽地與塞垣通山脈紆迴指大同黑霧不消
陰磴雪翠微時下石壇風燔柴有制存周典持
節無人出漢宮幽縹嶽靈何所寄巋然碑版覆
苔紅

不盡浮雲起北隅離離城郭望中孤荒原白草
還今古戰骨青燐半有無委伏萬山連抱犢嶺
屹一道隱飛狐憑高莫問探符事昔日羸秦亦

已徂

故宮詞

慈寧宮禁老莓苔元日驚傳法從來上下隔簾
遙拜畢六龍飛輅一時回

故宮人左氏年五十餘矣今為民間澣衣賴掖庭遺事言最詳確

傳

眉

竹嶺山西太原人

雜咏

駑馬喜在後惡馬喜在先惡馬當用轡駑馬當
用鞭燕雀起道旁駑駘不肯前狡憤復湍汗盡
日勞鞍韉良馬心膽定千里咫尺間飢不食惡
草渴不飲濁泉被甲盤蟻封注波帶橐鞬主人

苟卓犖筋骨安足憐鐵騎滿原野一匹攻中堅
旌旗為之靡壘壁隨周旋斬得大將頭戰鼓聲
闐闐沙場塵土歇雄心仍九邊

陳

盟

雲難無盟四川富順人

與親友話舊

江流日夜度高安却幸同人老釣竿天下晨星
餘幾點枝頭碩果未全殘班班蘭笋抽香玉隱
隱雲烟護藥欄所願故鄉歸有路披襟重話再
生歡

陸廷掄

懸圃江南興化人

春興

鄉國愁難釋他鄉歎獨棲
暖沙低燕雀水檻集
鳧鷖花樹傷心麗風雲
入眼迷時危無限淚盡
向暮春啼

中秋

荏苒佳辰至乾坤尚甲兵
江烟南北斷秋月古今
明影闊連鯨解光遙接
鳳城美人猶未返愁
絕玉簫聲

過史相國墳

廣陵城北一孤墳云是先朝舊督臣
冢上斷碑

題漢字路旁荒草拜行人
滄波嗚咽三江戎碧
血淒涼萬古春一自前軍星墜後
至今無復見
綸巾

龔

賢

半千柴丈江南崑山人江寧籍
半畝園詩草選中晚唐詩紀

一公得法東遊

師去忽經年書來兩月前
折梅辭蔣廟帶雪下
吳船道大終難隱蓬飄未易旋
相思但相念切
莫寄詩篇

登岱

勒馬瞻東岱嗟我勢獨尊
半空懸日觀一竇仰

天門氣接荆吳白雲歸齊魯昏久虛封禪事碑
碣幸長存

扁舟

扁舟當曉發沙岸杳然空人語蠻烟外雞鳴海
色中短衣曾去國白首尚飄蓬不讀荆軻傳羞
為一劍雄

飲徐氏園

春來無此日午過尚如朝水氣亭三面城陰柳
半腰清歌連白舫長笛隔紅橋最是歡娛地年
華覺易消

與費密登清涼臺

與爾傾盃酒閒登山上臺臺高出城闕一望大
江開日入牛羊下天空鴻鴈來六朝無廢址滿
地是蒼苔

登眺傷心處

登眺傷心處臺城與石城雄關迷虎踞破寺入
雞鳴一夕金笳引無邊秋草生橐駝爾何物驅
入漢家營

晚出燕子磯東下

江天忽無際一舸在中流遠岫已將沒夕陽猶

未收自憐為客慣轉覺到家愁別酒初醒處蒼
烟下白鷗

赴招

山家煮酒對斜曛野客相期隔嶺雲僻路人蹤
猶未見遙村犬吠已先聞杏知全放逢多處桃
亦爭開有二分護懶苦辭辭不得就君今喜坐
論文

揚州曲

江上誰傳戰鼓來流亡士女闕如雷月明今晚
天街靜十二城門到曉開

避賊還須先避兵六街雞犬夜無聲糝樓半掩
美人盡茉莉花開香滿城

王邦畿

誠齋說作廣東番禺人

姑蘇

歌舞聲高霸業空闔閭城畔太湖東清風伍相
孤祠裏明月三吳一沼中鹿性已忘臺草綠魚
腸猶蝕土花紅春秋事在書生夢立馬哀吟恨
不同

燕臺

地入幽州白日沉寒雲莽莽水陰陰亦知七首

無成事只重荆卿一片心老馬過宮頻內顧高
臺遊客獨長吟朱書玉簡先朝物流落人間直
至今

楚宮

五千里路昔稱雄餘烈猶存霸國風雒水一窺
周室鼎秦庭拾得楚人弓宮中顏色誇腰細澤
畔文章怨命窮頭上有天難問處江陵樹色月
朦朧

金陵

王氣升沉想象中早潮雲白暮潮紅樓臺六代

歸荒草禮樂先皇出故宮未信長淮終不返有
時明月自當空行人南向諸陵近潦水那堪薦
晚風

送魏和公歸里

行李當途欲出關離亭有酒不歡顏要知鄉國
無多路只是梅花隔一山知己痛心如死別勞
人渡海似生還粵城西畔臺南畔不得畱君駐
此間

馮班

定遠江南常熟人

雜詩七首

日暮沙風起駑馬不肯前平生舊行處黃河古
岸邊戰地添新壘荒墳露壤輒試問遼東鶴如
今是幾年

人生抱志節所遇蓋偶然徃徃中下材逢時幸
瓦全盛譽冠中區膏明惟自煎支天計不就今
為人所憐

誦君慟哭書咏君黍離詩悠悠寸衷事百歲誰
當知臧獲駕駑蹇騏驥無所施天崩與海竭共
盡亦何辭

苟生既不易罔死亦何稱生死諒微渺神理儻

有憑寢薪以待燃履霜未知冰多謝俗中子迷
謬何相仍

濁河水欲合北風雪滿天荒村無鷄犬亭亭起
夕烟暮齒猶為客經年在道邊誰言蘇季子惟
須二頃田

讀書目力盡彎弓臂不開栖栖五十載餘生真
可哀山川百戰處昔人已蒿萊於今一具骨不
知何處理

始言風嫋嫋俄見雪紛紛窮冬白日促垂老却
離羣孤囊空敝衣一身愧長勤惟有庭中樹偏

傷殷仲文

冬日書

冬至林葉凋寒山草猶綠寂寂空庭中微風入
叢竹人道自修短白日無淹速斗酒聊自斟吾
生已云足

送董師望

把酒送君行為君歌松枝松枝生高坂弱蘿來
附之相纏兩青青自謂恒不離一朝霜雪下蘿
死松不知君行何所屆君歸當何期四海雖云
廣骨月先見疑努力自保愛勿為行路欺

經廢宅

蕪沒蒼山路兵餘廢寺多鬼神應護惜麋鹿欲
如何迸笋穿空樹頽垣繚敗蘿高人放鶴處獵
客漫張羅

京口阻風

雲片起風色江邊又滯畱潮疑驅白馬山似見
黃牛瑟瑟楓林晚紛紛蓼葉秋自非京口酒何
以慰羈愁

兵後送友人避地

尊酒傾未盡征車發已遲可憐從此去長是憶

君時燐火宵行怯墟烟曉望迷詩書既無用何處覓新知

陸繁昭

拒石浙江錢塘人

短歌行送潘新潭遊燕

少年不得意馳騁燕山月五月悲風號馬蹄清
夜發關頭美酒清且多送君一飲朱顏酡行逢
故人暫傾倒日夜相思可奈何執君手淚霑臆
遠遊何用長相憶平生有仇會欲報腰下寶刀
脫未得

金沙灘

步屨金沙渡朝陽出翠微鹿眠芳草石人上釣
魚磯松子山僧飯蓮花處士衣林泉雖可樂吾
意敢忘機

晨步韜光道中示移暉上人

苔徑凌晨步籬花帶露垂溪雲流不盡海日起
何遲往事每多悔他生未可期不如歸白社杖
履日相隨

南屏雜詩

選二

上人蒙難後而我亦餘生不為浮名誤焉知出
世情晴嵐開曉色寒鳥變春聲若許陶潛醉相

遺民詩卷第九
隨入化城

月冷宮人墓雲橫太子灣可憐興廢跡都在有
無間遣悶惟耽酒高吟復看山荒原嘶牧馬一
聽淚潺湲

遺民詩卷第九

寶香山人 卓爾堪 子任選輯

吳

姓

柴菴江南興化人
送老吟

尋廬山舊徑晚歸

出山故遲遲似與幽人別石徑松風吹巖花帶
雨折晚心遇景留前賞逢僧說青靄近已無夕
陽明復滅西嶺吟眺處回首生虹蜺下飲彭湖
水沙渚淨如雪歸來新月白烟雲猶可擷

五月寄王子象山

雷聲殷昨夜知是前村雨潭西溪水長猶得灌

禾黍新苗旣已茂餘花潤園圃冉冉時序侵陶
陶夏維午竒懷鬱嘉辰惓念同心侶欲持一樽
酒斟酌就君語谿流遍花林蒼然間平楚緘書
澥上雲慙慙結情縷

雜興

空林何歷歷落葉盡秋聲此葉連根株三春曾
發榮青青覆苑牆苑苑映園亭行道得蔭覆寒
芳采其英如何秋節至蕭條華葉傾辭枝猶未
下依根尚怍營颺風自北來吹之令飄零露下
草根蟲感激和哀鳴人生無根蒂浮華竟何成

知慧日趨衰終與憂患并睠懷古志士何以立
修名

感懷

翩翩澥上鳥晨夕各雙翔所歡獨不見離憂追
中腸明明共素月照我羅衣裳浮雲自西來遂
覺隔他鄉盈盈星與漢咫尺猶相望況復萬里
遠音書歲月長秋風吹白鴈昨夜度微霜尺素
贈遠人苦辭限衡陽上林渺何處悲鳴以彷徨

築塲吟

漉取河下泥增築岼邊土不患河水深但愁秋

夜雨坐視上天漏愧無寸石補禾耳日日長刈
獲徒辛苦桃桔響不歇山歌相和發草頭棲白
露溪上落殘月幸值天晴泥土乾急春猶得接
晨餐

村晚

杖藜新霽後落日下荆扉春及商農事江平問
釣磯輕烟青岬柳細雨綠園薇野老柴門外相
隨雞犬歸

湘妃竹

遺恨滿江湄淒淒憶別離寒梢雲起處疎影月

來時水識湘靈怨山看帝子疑蕭騷千古意只
有淚痕知

新晴

逕竹新含露涼風吹草堂水痕秋漸落蔬甲日
看長扶杖行吟好逢花坐酌香浮雲須卷盡莫
令復飛揚

棲賢寺

三峽次玉淵乃至棲賢而五老峙其東

棲賢三峽北俯瞰玉淵清泉壑最幽處古人無
限情廢祠仍寂寞片石自崢嶸五老凌霄出芙
蓉天際生

二月雨雪

滯雨凝寒久回風吹雪斜
三春來朔氣萬里走
驚沙故國愁邊水孤城夢後笳
今宵吟更苦相
伴舊啼鴉

蕪城懷古

蒼茫江澗畔喪亂幾經秋
却恨青淮水孤城日
夜流雲低京口樹月上
玉人樓錦纜南遊後何
時歌吹休

聞楊子自彭城歸寄此問之

聞有風塵色知歌行路難
曾逢新使者一問舊

長安行李淹春日開樽及藥欄
有無從圯上得
受異書看

遣病

亂離此日是誰春自咏新詩倍愴神
羈客不堪
愁作伴空村只有老隨人
山中藥草虛持錘谿
畔桃花誤問津汨汨殘生雙眼在
淚痕到處總
風塵

潭西王恭人墓

黯黯消魂難及晨潭西風雨助悲辛
若令綦縞
能偕隱未必功名累此身
喪亂空餘今日淚羈

孤聊作暫時人可憐歲月干戈裏啼鳥飛花不
是春

春夕

日日淒涼厭歲新苦吟今夕轉傷神愁從雪後
聽歸鴈坐對燈前憶故人折柳落梅縈客思悲
笳橫笛作邊春杖藜衰病憐生事新霽還應理
舊綸

閏三月初旬阻雨不得展先人墓得心字
寒色蒼茫裏暮猿哀且吟松楸時在望雨露感
何深淮水原連澗谿流各異潯飄風胡發發白

日故陰陰冤鳥長啣恨淒鴻忽斷音春暉遊子
意芳草故園心社臘分秦漢衣冠見古今魂羈
愁自斷骨瘁病相侵化鶴歸華表將書去上林
今春寒食閏血淚倍沾襟

寒夜咏盆草寄友人

芳草寒仍綠萋萋對酒樽可憐逢歲暮猶自待
王孫

有感

疑是當年丁令威重來不見舊荆扉憑誰寄語
青城鶴莫去人間帶箭歸

李

沂

艾山壺菴江南興化人
鸞嘯堂集

灣頭虎

揚州灣頭有虎夫江淮之間故無虎
虎胡為乎來虎胡為乎來作灣頭虎

南山有獸眈其目白其額咆哮憑陵驚我都邑

解一 磨不至鳳不翔雙目眈眈來遊我疆解二 偪處

我里伺我行旅饕餮我婦子誰假女羽翼女欲

則安極解三 張我弓挾我矢願言逐虎哀我羣醜

掌迹如盜林薄風吼解四 朝逐虎暮逐虎逐虎不

得官長怒窮民孔棘匪惟伊虎之故解五

東家兒行

濁水不流泥滑滑東家小兒來養鴨老鴨知人
聲小鴨亂雜行奔入田中啜啜食禾穗低頭忍
罵驅鴨去去年種桑長河湄桑樹雖小桑葉肥
里中騎馬官人歸出門探頭望乃是東家兒烹
羊豕走親戚東家老嫗笑啞啞

築堤謠

持畚來築河堤藉用橐土覆之一畚土三人持
持畚來築河堤飢死老父凍死妻誰者堤我築
之

持畚來築河堤我築之水決之

插秧歌

辛卯水大至李子愍農人之苦作插

秧歌

朝插秧暮插秧往視我田中乃有鰕與魴
朝耘田暮耘田往視我田中乃有蒲與蓮
誰者造屋吾為爾操版築誰者有牛羊吾願為
爾牧

玉壺吟

予夜夢一男子持扇見示題曰玉壺

澄徹冷貯本色覺而為此吟也

堯之聖兮舜為弼皇紀張兮定八極八極定兮
二曜光端予軌兮由周行由周行兮靈之綏遵
無為兮樂安居道之喪兮繩墨既多紛總總兮
王化譌流之濁兮源弗清法令章兮亂日生亂
日生兮巨盜起攘神器兮劫天子海水洶兮山
之椒天鬪其日兮民為妖民為妖兮心為鬼絕
陽光兮毒生理淬予劍兮張予弓貫魍魎兮磔
三彭三彭磔兮六合清驂兩龍兮遊赤城幹元
化兮紐虛無返予初兮歸玉壺

鹿馬山人歌

鹿馬山 烈皇帝葬處也關中王弘
撰于三月十九日匍匐山下泣奠自
稱鹿馬山人陽山李沂再拜作歌

鹿馬山頭妖鳥啼鹿馬山下草離離鹿馬山人
空涕洟

教場黑氣歌

老者吁少者悸聚千萬人來看黑氣 黑者氣
起教場之隅團沙舞礫奔轆乎空虚鬼與神與
四境苦祝融石田不可以耕飢虎黑羆咀嚼

橫行吁嗟乎蒼生

和張辭奇天寧寺放生馬歌

蕪城城北梵王宮中有汗血千里驄久聞此馬
大宛種啾啾行閃黃金瞳太僕圉人在何處空
牽老衲行廊東山僧豈用歷峻坂枉殺古殿藏
飛龍驚沙暗天吹朔風千羣絡鐵度居庸中原
駑馬受驅使銀鞍錦韉春花紅報主未遂萬里
志戰鼓化作霜林鐘馬乎馬乎爾胡委身垂首
荒寺中將軍待爾陷陣收奇功

揚州叅將李鐵臉歌

天下兵官誰最壯眼中惟見李參將參將名將
功不成至今揚人爲惆悵初至維揚號令明旌
旗壁壘雄風生連宵火砲教夜戰自奮刀槊來
奪營私帑椎牛饗壯士金錢射中誰敢爭朝食
潢池誓翦滅五千紫塞堪橫行承平旣久武備
弛海內傾洞兵戈起朝貴由來賤武臣羣兇坐
視憂天子已聞關內縱長鯨更傳劍外奔封豕
棘門壩上皆兒童蕭娘呂姥尤龍鍾日驅市人
潤鋒鏑飛書奏捷乾清宮神州大勢漸崩蕩誰
把赤心報君上但呼鐵臉人盡知淮海之間稱

保障城東夜落星光紫參將未死馬先死參將
旣死人歎嗟明年廣陵城上吹邊笳

棗園斷藤詩爲從兄廷尉映碧賦

紫藤紫藤亦孔異上枝扶疎拂雲氣下根一本
分兩幹一幹獨存一幹斷主人咨嗟紫藤下來
歲枯條應半架誰知春風百卉生二幹抽莖還
並榮一幹雖生不著地神理相資賴同氣棗園
客到爭相誇有眼未見無根花對花乘興且飲
酒笑向主人索一斗

避亂舟中作

避地家何處飄然更出門艱難攜十口風雨向
孤村遠浦殘荷立寒沙急浪吞偷生任漂泊時
事不堪論

挽從伯父瞻鹿公

喪亂君臣在偏安社稷蕪封章懸日月旅櫬歷
江湖報國餘孤劍匡時屈壯圖故園春樹綠愁
聽野禽呼

看鬪促織

瓦礫藏身小昂昂喜鬪爭當塲頻鼓翅一敗遂
吞聲暫快兒童意私加將帥名九秋今欲盡爾

輩漫橫行

送何公龍遊秦中

西京王者宅形勝甲寰中華岳排雲峻終南壓
地雄虎狼秦孽在松栢漢陵空策馬長安道應
懷歌大風

放鳥

尚憶故巢在投林意不迷野田雖斲飽綠樹得
深啼翅短風雲足身輕日月低回頭看燕雀猶
戀畫堂棲

四月風初夏

四月風光好朝朝坐水涯
婢尋雷後菌僧送雨
前茶逕竹抽新筍
園桃落晚花布裘閒可典
載酒過鄰家

和湯孫移橙

阿咸幽興好雜卉滿庭隅
自說南牕外新添樹
一株涼陰書屋借佳味
酒人須能解笑摘黃金
實無忘餉老夫

遊山子廟

尋春聊出郭晴色帶川光
綵扇芳堤女銀箏畫
舸郎鳥藏森木嘯花擁
醉人香古塚荒原上
萋

萋碧草長

贈劉雪舫

故新樂侯

夙昔雲霄上胡為烟水鄉
行蹤雜漁父至戚是
天王萬死驚身剩全家
與國亡江城時邂逅為
爾一神傷

渡黃河

平原遙望隔洪波白草連天走駱駝
短褐輕裝乘小艇西風落日渡黃河
九州貢賦香秔遠夾岸弓刀鐵騎多
常羨祖生能擊楫壯心回首忽蹉跎

從弟鏡月自廬山歸出三疊泉五老峰
諸圖見示

匡廬隱遯高人去石鏡蒼屏萬古留芒屨遠尋
三疊水霜縑歸畫五峰秋雲晴喜見香爐出磻
響疑聞瀑布流欲向東林攜短杖便從楊子放
扁舟

送十力禪師還山

客身獨向三千里僧臘將周六十年短棹更開
彭蠡浪孤帆遙帶廣陵烟猿啼疊嶂迎歸衲虎
卧空林守法筵借問天涯何日會浮雲蹤迹兩

茫然

丙寅元日

老屋河干漸不支年來河伯故相欺頽簷缺壁
還風雪濁酒辛盤自歲時浪把一生供敝帚獨
留雙眼看殘棋陽回少慰幽人意檢點梅花放
幾枝

青樓曲

誰家輕薄兒林邊飛彈子不能中飛禽打入樓
牕裏

東莊對月獨坐城中送酒方至

野月穿雲出城中酒到時先傾一大白把與刺
船兒

庚戌夏日水中口號

田疇已沉沒流水入我居獨坐對水歎穉子來
釣魚

架木不可履竹杖強扶持失足水中立宛如白
鷺鷥

擬宮詞

水晶簾捲不禁風閒聽流鶯小苑中芍藥漸開
春似錦君王自不到西宮

重過金陵

秋風又到秣陵關獨客窮途尚未還武定橋頭
新月上朦朧遙望紫金山

史閣部墓

汴水無情只向東荒原萬木起悲風傳聞鐵騎
墳前過下馬捫衣拜相公

贈陸縣圃

萬卷詩書卧一丘蓬門不出幾經秋捲簾又見
春風度燕子飛飛入小樓

野望

遺民詩九
風捲蓬根野日昏含悽倚杖望孤村村中昨夜
逃亡盡還有催租吏打門

錢邦芭

開少江南丹徒人後為僧稱大錯大師

熒惑徙

天道何遠人道何邇宋公三言熒惑退徙鄒行
呼飛霜集易水歌虹貫日匹夫精誠動上蒼九
重何難修令德後世天象本自明側身恐懼不
復聞無可奈何時一杯酒勸長星

公莫舞

咸陽王氣消白日綺筵珍錯鳳脂泣轅門鼓樂

叶鈞天赤龍五采亞夫嘿寶玦三舉君不知項
莊拔劍當門入公莫舞公莫舞座中赤帝真吾
主樊噲眦裂項王驚客何為者怒如許公莫舞
公莫舞項伯蔽帝存項宗玉斗撞碎君何功

客星高

天子來張我目士固有志何相迫天子卧加我
足客星犯座天變速天子不見見人臣君房癡
絕何足論君不見吳山高山高水復清諫議何
能下子陵狂奴故態誰能馴桐江釣竿有舊綸
高節清風百世興先生持此報故人礪谿渭水

徒紛紜

鸚鵡曲

漁陽搗音何妙雖小有才未聞道鸚鵡賦詞何
麗才高自炫應招忌居才未聞徒嫚罵況當衰
世誰能下大兒孔文舉小兒楊德祖如公所許
皆觸阿瞞怒先後駢戮亦何補鸚鵡能言為舌
誤莫倚善題鸚鵡賦黃祖不敵讐主簿

涼風臺

涼風臺前虹貫日涼風臺下池水赤戲書敕字
怪兒曹覆盆夜破赤星蝕叮嚀慎勿效前人前

人者誰君自名濟南何在三不語却為樂林求
樂土君家骨肉多竒冤作法於涼何必言君不
見前有涼風臺後有華林園

反覆子

反覆子何足取當年反覆只為汝于今大物已
我歸此輩反覆終我侮莫云反覆多厚利劉昉
極刑鄭盧廢君不見反覆臣多殺身前成濟後
張衡

無賴賊

無賴賊逢人便殺不可卽無賴豈可託君國此

家事休問人佳兒佳婦詎不聞牝雞一鳴唐祚
移唐家子孫靡子遺可惜為公輕剪鬚先出後
用何嫌疑君臣父子恩可賣犬馬畜臣何足怪
莫云不負李密恩此賊負國終無賴

人犧歎

少室禱犧牲缺宋公沐浴一何潔俎盤纍然誰
為者偃卧其中云非假春秋用人曾大書公今
自用復何也俎盤沐浴公誠潔公有口過誰能
悅北門徒賦明河篇溺器殷勤誰作緣

維州冤

無憂城祖宗地尺寸土安可棄唐宰相便私計
宋史臣持腐議朋黨禍患雖一時萬世是非何
可廢宋代君臣終斯志燕雲十六州委棄無復
意偏安和議為國累金元終得乘其弊謀國之
誤寧無自

閹學博

閹學博令非虐青氈歲月老生徒深宮別傳女
官學女官之師得王振犬馬畜臣奸閹進君臣
報禮疑相應土木之變何煩訊學博閹非徒然
女郎夢卜求名賢君不見漢家官刑得史遷

過錫山贈郭夔一

崑崙柱蒼旻日月走西東
溟渤蕩坤維蛟龍遊
其中至人恢德量涵納不可窮
山海貢靈異精氣潛相通

歸田詩 選三

雨後聞催耕侵晨驅牛出望杏
復瞻葵樹生如不及五穀本
五木山中有恒歷一犁春雨足
殷雷起潛蟄生物各知時而人
乃惰惑每誦勸農詩謹遵先民
則稼穡知艱難庶免逸居啞

春至雨露滋百草俱萌茁荷鋤
周田塍土膏解

枯澀汨汨水泉動蠕蠕蚯蚓出
呼童治犁鋤催耕不遑息天時
一相違事倍功猶嗇君子旣勞
心小人應食力俯仰天地間貴
賤咸有職一人肆遊惰羣情能
無惻飽暖不知恥恐有災患及
自非終歲勤豐稔安可必

春深草色齊川原氣鮮潔牛羊
各在野芻牧自欣悅播種審所
宜寒暑考令節耕耘有妙理勤
惰爭巧拙鹵莽最所戒細心求
無斁上讀古農書先聖遺訓切
衣食追本源孰敢云不屑

窮士吟

貧爲士之常窮亦是其固美里自逍遙匡園等
平素河上有何憂蘆中可問渡涉江與哀郢豈
謂終迷路莫效阮生哭莫賡東野句智窮得神
理學窮見真趣文窮省浮辭命窮識天數交窮
始有道不爲世人附古來能窮者往往知其故

野寺

野寺雖荒僻祇園在此間棲禪雙樹老洗盃一
身閒佛古燈常寂鐘殘鶴未還經過塵慮淨何
必掩松關

晚步盍玉菴

泉聲何處急落葉滿溪梁燈影明虛殿松陰冷
石牀茶烟山翠合花雨屐痕香回首歸鴉亂千
峰遞夕陽

送侯若孩從軍

漁陽烽火昨來驚倚劍遙看太白明大帥龍堆
朝卷幔書生虎帳夜談兵墨磨鐵盾飛新檄箭
射蠻書下故城會見降旗迎馬首饒歌高唱陣
雲平

汪

颯

魏美浙江仁和人

挽前指揮卓文伯元配殉節錢宜人

兵戈遍野滿城驚
矢志投淵見獨醒
魂斷廣陵啼夜月
珮沉沉泣湘靈
芳名直越清風嶺
潔操能追止水亭
今古綱常爰賴植
彤篇千載自流馨

金俊明

孝章耿菴江南吳縣人

觀槿

獨居感時變暑謝徂秋
始閒心察蘓木零悴一
何駛彼草閒三時舜華乃夕死
凌晨照初旭容光洵鮮美
姚冶姬姜姿方花猶未似灼灼
誠可憐紛紛忽已萎如彼蜉蝣翼
楚楚將安恃榮衰

隨旦暮久暫豈殊理
歎息莊生言彭殤齊曠視
庶保松筠心修名企君子

宋儒醇

行魯冷泉江南廬江人

崇禎乙亥渠賊張獻忠陷廬江

安居三百年驚聞大盜起
大盜始何人米脂張與李
所過無堅城屠人如狗豕
分支掠江北處處皆烽壘
是時守土官絕不諳戎事
搜括橫索錢鞭笞竭骨髓
復遭歲大無蝗蝻遍井里
我民日以蹙展轉無生理
丁壯陷賊中老弱填溝洫
普天皆盜賊氣運成極否
廬城彈丸土守備鮮

千指晝夜攻愈急援兵無隻矢可憐城陷日積
骸同山峙婦女矢貞烈大半沉於水逃亡或被
擒罵賊突鋒死倉皇走西山相依父與子一步
一吞聲吾生何至此

象山居屋為賊所焚

世居象山麓棟宇自永樂我祖侍御公實始卜
茲宅老屋存古製樸素無丹堊傳沿歷八世聚
族已千百無何遭世亂巨寇盤江北所在肆焚
戮彌望皆荒陌狐狸叫空垣雉兔伏頽壁重踐
舊里門痛哭念先澤

先侍御疏稿鹿園集并藏書俱燼於火

先澤所貽留匪止數椽屋自從遜國後遺疏藏
山谷手著鹿園集諷刺在骨肉以故數百年堅
匿不肯出兼貯六藝籍甲乙編貯麓天欲喪斯
文縱橫卧馬腹賊以圖籍
供馬卧狼籍灰燼餘檢拾不盈
束字迹半磨滅斷殘不可讀世運際陽九文獻
遭百六吁嗟重吁嗟煩苦亂心曲

丁丑秋重葺茅屋于舊址

編茅蔽風雨偪隘聊容膝秋風響落葉驚疑動
魂魄草木皆兵氣寄身渾如客哀哀鴻鴈鳴相

將下廣澤南土滿戈甲慎哉振高翮稻梁不可
謀千里人烟寂

壬午寇從六安來復破廬江盡殲老穉
捕繫丁壯廬舍金幣焚掠殆盡堞垣
踐毀如平地蓋從來未有之慘也紀

事一首

崇禎十五年干支在壬午前此流亡民強半歸
故土漸漸闢荒田種麥兼種稌四月大麥熟秧
田綠可覩賊從蓼六來啣枚疾如羽蹂躪四野
田麥枯不得取人民復散亡孤城鮮完堵雉堞

踐為隍丁壯遭繫捕剪髮阻歸路分曹隸行伍
間或逃歸鄉官法猛如虎從賊尚苟延歸鄉翻
逢怒賊勢益滋蔓閭閻益孤苦何不寬其網招
之返農圃腐儒無長筭良民氣莫吐紀此戒後
人撫循望慈父

秋雨浹旬挈家避寇平山砦夜將半忽
聞砦外兵甲鱗鱗作呵咤聲急呼家
人出走纔出門寺牆傾圮卽所坐卧
處回視桁衣牀縵皆糜碎如割一家
幸免于難

秋雨動浹旬避難平山砦聚葉方煨芋燒湯旋
沃疥時余患疥雨餘四山黑恣眠少弛戒何來兵甲
聲崩裂如澎湃急起呼家人倉皇出門邁四顧
空山寂旋驚古壁壞回看坐卧處摧壓無完解
此豈神所為修德慎毋懈

由金牛至石嘴頭將渡焦湖阻風小泊
攜家數逃難行行至金牛霜風吹我衣青火照
髑髏覓得小漁船趁月下石頭風急湖波掀五
兩不可浮且喜遠賊壘暫泊湖邊溝忽聞炊飯
香至味過珍羞怪得韓王孫一飯千金酬匿影山中不敢

舉火所食惟乾
餬澗水而已

翌日湖中風雪轉甚

人生當亂離所遇皆艱難翻身脫虎口收召驚
魂還昨日苦風霾今苦雪漫漫信宿漁舫中局
促心為酸乾坤多畏途何處無波瀾

暫寓居巢復徙濡須塢

居巢居未穩傳聞賊搜湖東望濡須塢側在大
江隅故人具舟楫迎我開精廬我欣往從之課
耕兼課書力僕餘三人朝夕勤菑畝暇則督二
子莫令學業疎古人處憂患著書聊以娛

匿影濡須時序屢改醉讀離騷愴然有
作

此鄉洵樂土淹留近二載披衣狎老農空江匿
文采灑淚讀離騷秋蘭芳未改咄哉楚懷王受
欺終不悔獨有汨羅魂沉寃深于海

望板子磯

朝望板子磯暮望板子磯磯上石嶙峋壁壘何
崔巍側聞左良玉擁兵清南畿馬阮誠豺虎良
玉亦梟鴟若非黃靖南立濟蕪湖師乾坤正多
故此舉太無知

甲申春三月

甲申春三月大盜犯宮闕肉食無遠謀徒勞賜
斧鉞前日餌賊降明日縱賊叛武臣怯戰鬪文
臣主羈絆馴致國破亡養虎自遺患賤子在草
野莫拯邦家難豈無撥亂心血淚空潛潛

南渡

黯黯鍾阜雲咽咽秦淮水南渡事已非門戶爭
未已坐視大廈傾無人雪國恥獨有史督輔盡
瘁繼以死一片孤忠心衆口交肆毀守江與守
淮議論徒爾爾

返舊居

帳望舊山林挂席返江郭五年阻豺虎松楸黯
無色白骨散寒岡荆榛滿廢宅十里無炊烟九
年不耕獲刈草粗結廬聊以永朝夕

耕西田

西山有薄田草茂不可鋤過江市沈牛深犁破
積蕪積蕪一朝去斥鹵變為腴眼見禾苗起莖
葉碩如蘆茲田久不耕土閑力有餘鄰叟曰不
然此乃脂膏濡一賊牽十人次第此中剗我聞
鄰叟語輟耕一長吁灑淚問高天良民有何辜

河邊古松蒼然獨秀特構茅齋榜曰松

存二子讀書其中暇則攜酒哦詩用

以自適

河邊營茅棟為愛古松存相逢如隔世相看首
俱髡爾老益蒼秀我老增憂煩讀書挹清潤醉
酒卧孤根同經亂離後存者有幾村爾我各無
恙懷哉大造恩緬邈陶柴桑得意欲忘言

山中初見燕子

翩翩何處來啣泥入我屋故家門館非飄泊依
誰宿且喜新巢成莫戀舊巢哭乾坤有浩劫顛

顛到羽族故傍主人飛喃喃如欲告豈不眷華
軒古道存山谷

十載亂離親知凋謝近喜徐趙二叟溝
屋比鄰阡陌交通往來言笑大有桃
源中人意作耦耕一首

漸喜老友還近在東冲口又喜舊親串移家住
西阜歲時伏臘交招要有二叟盤剪鮑照葵盆
盛元亮酒言笑無拘忌放懷樂畎畝耦耕屬吾
徒真契沮溺久

二子過白門寄訊老友

舊畿邈江河滄桑倏已更秋風何蕭瑟暮潮黯
吞聲白門有老友飄蕩如風旌一別十五年孤
抱向誰傾見時如相問云我秉耒耕西田西坵
曲山水有餘清招之倘肯來當為啟柴荆

李世熊

元仲福建寧化人

舟過水陽

烟樹渺然綠幽意永晨夕十里一農舍五里一
漁宅風逆浪擁舟兀坐百端集鷗羣矜羽靜參
差蹊空碧吾欲坐友之機心苦未息

樓眺

匹練村烟靜洄灣點一漚雲危寒欲墮野散暝
能收慘碧沉山魄苛風禁鳥喉春傷千里自瑟
瑟但如秋

病懷

薄雲片片過溪樓門掩殘燈照獨愁南海寄書
求益智北堂無地種忘憂籐枝刺月風簾細竹
舊流光露葉稠白草黃沙千萬里看人屠狗盡
封侯

山家

幾層梅柳覆溪頭一室如舟載客遊芥尾釀成

金宛轉笋尖剥出玉夷猶鶯調澁語通泉細竹
引清香入酒柔齋罷更聞鑪茗沸嗒然忘語媿
浮鷗

獨松

迴薄山水青摩弄日月白上友不羈雲下友忘
年石

童唱牧羊甚悲

一鳥迦陵咽漢臣世尊到此也沾巾雪山會上
無蘇武海上應無嚙雪人

李永周

完冲四川成都人

遺民詩九
三六
旅中望月

獨有秋中月何人不喜看久留滄海影遠共錦
江寒戎馬家難問他鄉淚未乾欲將數行信無
處寄平安

張

惣

僧持南村江南江寧人

飲酒四首

選一

飄風吹白日慘澹淒以繁沉陰積素憂索莫無
朝昏我友顧蓬室默坐兩無言攜手同出戶但
看孤烟村

田家

徑入一林竹濃陰覆短垣寒光通蓼嶼秋氣滿
柴門風浪何曾及桑麻自可論皤然聽老婦細
碎說寒暄

過東坡書院

一院靜如此門開祇見泉山光墮遠竹水色亂
空烟黃葉短牆外蒼碑荒徑前坡公如可作攜
月夜來眠

登拜經臺觀日出

爭傳觀日出策杖石臺行夜靜雲初朗天空海
乍明纔驚金彩現旋訝玉華生一向扶桑出光

輝萬國晴

信宿雲峰菴

每見雲成嶺今看峰似雲幽閒仍自定孤峭總
難羣松下磬聲出竹間溪影分柴門常嬾閉久
已絕塵氛

舟泊問津亭故趾登岸

小飯松陰泊畫船武夷冬暖訪彭仙層層峰斷
飛微雨曲曲溪深橫遠烟鳥篆蒼苔難覓路虬
盤古樹不知年何時結屋幔亭下長嘯空林手
一編

登天台聞桃源洞杳不可問遂不往

空憶桃花流水香欲尋洞口竟荒唐仙緣未了
歸何急千載悠悠恨杳茫

石梁

兩道飛泉作急湍石梁奔瀉亂雲盤高天祇有
冰霜氣毛髮應知六月寒

出武夷權歌九首

選一

二曲珊珊環珮峰並肩姊妹最從容爭看玉女
纖塵絕若比巫山隔萬重

蔣易

前民江南江都人
石間集

別于一于皇先還瓜渚不得到焦山
孤嶼望不遠渺然烟霧青漁舟牽世務樵客向
空冥鳥挾風歸樹江流月到亭異時應獨上處
處想曾經

春雪宿于皇飢鳳軒

軒在雞鳴山右

亂馬踏邊聲殘鐘吼禁城雪將爭曉霽寒不放
春晴門鵲侵晨出霜毛向客生披衣望鍾阜雲
氣正縱橫

婦愁

烽火攜家竄西風倚舊林不知寒事逼却怪婦

愁深村稻殘秋雨鄰衣急夜碓江湖人共笑飄
泊爾何心

立春對雪待于一不到

茅屋期相過冰湖隔釣船迴風停鴈陣急雪變
春天遲暮心何向登臨興黯然新詩應自好窮
老竟誰傳

清涼山頂留別于皇

招提上夕陽別酒置崇岡秋老孤帆色人輕百
戰場江雲平楚岸風葉減吳霜來日空回首思
君獨渺茫

雪中過于一

急雪求深巷荒池啟暮扉衝泥何事出裹藥冒
寒歸弟病他鄉淚春陰一室飢棲霞山寺別牢
落意多違

夏日樓頭待雨杜若同家兄過飲分韻
長日塵隨眼危樓望獨遙片雲生浩蕩衆壑勢
飄颻吳楚天分雨江淮水接橋醉歸防躍馬舟
子暗相招

亂後過瓜洲舊居

鳥散瓜洲渡書歸楊僕船荒城無馬迹廣厦幾

人烟晴日江光凜秋星殺氣纏蓬蒿原自滿此
別更蕭然

茶村梅陌同步北固山徑

北郭連山徑殘江動客襟乍驚秋樹少猶覺夕
陽深埃火寒依嶺禪鐘靜在林幾時看戰鬪寂
寞到于今

雨後同史成江頭待月

龍吼蒼江去漁帆亂晚晴浪危山改色虹見雨
吞聲遠待南徐月清談北府兵轉添雲悵望重
覺負深情

十五夜默菴招飲

應為冰蟾好羈縲共野亭醉開雙淚眼寒動一天星戰鼓春風寂漁燈夜氣腥爐存先世物香蕪蔗漿青

汪

薌

義仲葯房江南歙縣人

題眉岫蒼松圖

東來黛色敷如眉上有百尺之長絲蟠雲者根叅天枝屈伸偃仰任紛披風霜染就歲寒姿棟梁何必勞工師衆竅于喁吹參差下方萬戶聞清颼夜深雷雨發其私繞地碎霞俱成芝長髯

真人號安期五色石煮爛如脂一聲嘯起驚赤螭翠蓋撐空天四垂

吳

琦

燦生浮槎江南江寧人

泊惠山

蒲帆渾不挂柔櫓碧峰前午熱投高寺心煩急冷泉松風吹上閣山月照歸船夜氣涼清境烏啼未肯眠

歸

莊

元公江南崑山人山遊詩

題福源寺羅漢松

福源建自梁大同創寺之年植此松歷千餘載

寺再廢此樹不改青葱龍大二十圍高難度攫
擎天際如虬龍石根鐵幹苔斑駁狂風搖動聲
錚鏦夜然長明燈晨撞萬石鐘聲光震耀生靈
怪柯葉常有白雲封水車之役大木盡斧斤欲
加鬼不容天王栢上方松昔年來游有題詠何
況此樹六朝之遺蹤松之名者今有報國古岱
宗彼以神京名嶽顯此獨晦匿于震澤之濱縹
緲峰大材僻處自矜貴賞翫不辱于凡庸大挺
植物有如此人生何必皆遭逢嗟哉人生何必
皆遭逢

落花詩

枝上黃鶯漸露身飛英歷亂墮紅塵將隨薜荔
依山鬼難共薜蘿待美人河北名園貪結子武
陵歸棹欲迷津香車寶馬緣都盡天與幽人一
錦茵

秋日和劉文成秋興七首

選一

西江南海競揚波中土塵沙可奈何無復老人
橋上迹徒聞壯士隴頭歌三更叫月離羣鴈永
夜嘶風伏櫪駟大厦再營梁木朽深山柟樹正
婆娑

范廷瑞

江南如皋人

孤村漫興與友人

露冷空堦蒼蘚滑隴上樵歌聲不歇白雲紅樹
野橋灣烟景迷離半明滅我為鼓柁時往還水
天之際看山月山月明千墮地霜更有殘蘆聲
浙浙對此寒光幽思生欲泛山陰道上雪何當
與爾一浩歌把酒問天相叫絕

冬日送安素還北固

攜手河橋畔停橈對夕曛人同江外鳥錫傍嶺
頭雲日暮孤帆急愁多二水分前山風雪裏珍

重惜離羣

孟 鼐

涉公河南杞縣人

前指揮卓煥妻錢氏乙酉揚州郡城陷

投水死從死者長幼七人感而賦之

乙酉當夏季兵火闖三吳維揚四戰地鋒刃爭
剗屠烈哉卓母心貞德幼所孚生世逢不辰從
容誓其夫守身貴先見否則白璧污榮辱在俄
頃寧緩須臾園中有池水清冽同冰壺抱子
奮然躍相繼兩小姑更有三幼叔遶池聲呱呱
淒惻悲無依及溺連孀姑池水為之溢池柳為

之枯遙遙二十載泣斷城頭烏

劉易

望之江南宣城人

邯鄲才人嫁為廝養卒婦

妾本邯鄲女才色重當年蒙恩入禁禦逮事趙
王遷錦衾猶未暖華屋已生烟恥作秦宮人流
落歸市廛落花依蔓草流水出清淵昔為華池
藻今作道傍荃揚蛾顧儔侶容態羞獨妍日夕
望故宮悽然雙淚泫

關山月

鼓角嚴更後關山月正明光搖瀚海動暈逐朔

風生孤戍蒼茫色寒笳斷續聲征夫一長望悽
絕故園情

塞下曲

蕭條古塞垣極目風塵昏蔓草縈枯骨驚沙走
斷魂炊烟生獨戍候火出孤墩亭障無人實憑
誰達至尊

過路斯湖卽宣城太守張路斯與鄭祥

遠爭釣磯率九子戰勝化龍處

張公爭釣處川澤為留名水帶魚龍氣風含戰
鬪聲春陰寒雨急芳渚暮潮平愁寂看同侶重

傷遊子情

吳姬年十五

吳姬年十五
齒苞乍開時
風態羞人近
春嬌不自持
當筵歌宛轉
閒坐弄參差
日暮含顰久
無由致所思

錢德震

武子浙江海鹽人

夜宿大梁有感

大梁城北俯黃河
寇盜當年擁白波
霖雨未聞投璧馬
陸沉終已誤干戈
九秋沙溢夷門路
萬戶人愁瓠子歌
最是王孫飄泊盡
故宮烟草不

勝多

暮秋登慈仁寺閣

珠林峻閣倚雲霄
檻外層陰縱目遙
北去關山真歷歷
南飛鴻雁轉蕭蕭
甘泉霜氣侵宮樹
碣石秋聲落海潮
莫放朔風吹劍佩
五陵游俠總難招

送白學士祭告孝陵及南嶽

壬午

睿德隆虞秩崇僚
肅楚征驛亭珠仗
麗江路錦帆明弓
劍憑天塹松楸對
石城攀髯千古事
歸胙百官情望嶽
涵雲樹浮湘引澤
蘅朱陵神宅

迥蒼水玉書清享用菁茅近祠看圭幣榮山川
雄勝賞典禮邁精誠向月懷仙署經秋計使程
倘過溘浦上太傅舊知名

姚康

康伯休那江南桐城人

濡須贈某

千章夏木倚牕清黃鳥相呼動遠情自是主人
應勝竹得因吾友與班荆亂餘對酒皆兵氣老
去論詩盡史評爲問武陵今在否好將此地報
淵明

潘

陸

江如江南吳江人

七夕

涼秋啟素節白露變離光朗月升半規衆星絕
天潢牛女判西東茲夕濟河梁暫詣成久要二
神會有常而我懷佳人萬里空相望違曠逾一
紀大義迫中腸天路可超越人事尚蒼茫荏冉
時序遷愴惻以徬徨

酬李叔則見訊

落落江春日鴻傳雲際聲懷人殊未已秋水又
空明道廣新知衆詩成老氣橫遙知采真罷刪
定在南榮

望亭道中

西風吹細雨孤櫂暮何依古驛人家盡寒塘野
篠稀浦昏鴉自集湖近鴈還飛鄉樹來朝見三
年此路違

同朱士叶北固山用唐人韻

高人住巖壑永日與忘形江愛秋濤壯山憐宿
雨青孤城迴別嶺雙嶼帶遙汀向夕尋僧梵經
行更繞庭

市汊夜泊有懷

野日延遐望清潭納衆流人家橫隄岸賈舶隱

中洲澤國烽初定殘年市晚休陰霞映明滅回
首思悠悠

彭澤縣

山郭倚江邊寥寥幾爨烟無時休驛騎昨日過
兵船地借陶潛著人思狄相賢何堪尋廢縣沙
草浸寒泉

過蕪湖東崑銅天士

江關日蕭索相望接烟波客厭三冬盡兵來千
帳多故人長契濶世事但悲歌棣萼東風發還
期一水過

從陽懷方爾止

渚盡江流濶浦斜川路深山當天柱末水見漢
皇心殘雪荒村晚悲風廢戍陰所思不可卽相
望一沾襟

馬當山

山形半江出潮勢去來紆阻岸橫雲氣傾崖逼
水區空洲寒戍廢石壁暮禽呼楚客南歸急神
風送有無

劍津

城下三溪合當時七校齊曾聞朱鷺出復見杜

鵑啼碧草年頻換蒼梧路總迷向來消息斷淚
盡浙江西

金陵二首

欲續忠臣傳彌深城闕哀三卿同日死千帳一
時來不污尚書印長留御史臺人生看晚節清
議謾相猜

誓死人心見無親真宰玄血穿西市土氣塞石
城天幽憤傳青史精魂泣下泉可憐宮禁物轉
眼賣青錢

江城解嚴臣溥歸自昭陽得平菴詩訊

兼寄山甫艾山懸圃

兵甲阻江邊歸人急歲年能無感時淚復把贈
行篇老鶴心彌遠冥鴻影自連何當殘雪夜重
到子猷船

鰲磯題孫夫人廟

何年遺廟俯嶙峋冠佩於今薦藻蘋水上自能
從白帝巴中應悔謝青春江花肯帶吳宮艷庭
草猶疑蜀道新此日永安俱灌莽女巫何處奏
迴神

送閻百詩

西郊秋色接江蘿會面何云遽解維九日又從
誰泛菊少年僅見子能詩不陪好月山中宿轉
益征帆天際思前路廣陵濤正壯縱觀莫負古
人期

丁卯橋懷許渾同大風用五微

誰從兩岸問苔磯想像田居隱少微一自青山
空麗藻又看綠野冷雲扉

丁卯莊為楊文襄所有今又廢

漁樵舊憶

村邊住烟火初經戰後稀江國鼓鼙何日罷老
農還向此中歸

北固山下柳青橋酒家

春風爛熳百花朝
山上紅芳江上潮
過盡游人看不厭
日斜半醉柳青橋

吳元辰

凡公江南興化人

嘉平八日省覲潭上夜阻雨雪宿三壑

古刹同李平菴陳皇錫

漠漠江天暗搖搖帆影遲
疎鐘人定後零雨歲寒時
野宿尋僧舍盤餐憶露葵
花林看咫尺竟日問津疑

冬日赴郡旅懷漫賦

朔吹連昏旦長河阻問津
冰霜憐晚歲牛馬向

時人鴈引鄉心切燈偏旅夜親
高堂應倚杖落日望行塵

譚宗

公子浙江餘姚人

上北高峰

登山便不慵
雙起北高峰
曉塔眠雲鳥
春泉養洞龍
海風朝影殿
天樂下疎松
一自西陵別
那知此地逢

歸度庾嶺

度嶺賦歸與嘉平月正初
歲華零落日童僕喪亡
餘雨碎梅花道風昏竹
葉廬積然下橫浦燈

火亂樵漁

九日登龍山

傷心百歲半東流
經歲關門補浪遊
九日每含他席淚
十年重見此山秋
清江晚堞寒生月
衰草黃雲奔入樓
恨不披襟最高處
同君散盡故園愁

王龍文

鼎子江南盱眙人
芥堂詩鈔

冷悶

歲儉愁酤酒蓬門雪
一隈紛華從老去
清簡自貧來原憲
安無病林逋癖
有梅吾衰銷衆念
偏

崇掌中杯

白下僧寮同緩耳
守歲兼東杜于皇

舊國當除夕
爐香對酒僧波殘
江海夜劫盡古
今燈改歲生千慮
諸天轉一乘
陽春迎楚客
椒頌祝良朋

風雨宿一納菴
同子亮師盈公
納公二上人

載酒沿堤秋氣高
山門苔蘚漱寒濤
長淮一夜添風雨
夢裏魚龍勢欲驕
淙淙涼夜客無眠
萬壑秋潮牕几前
水力知爭

城幾版愁人不暇問桑田

林時益

長盛江西人

正月十二日同李咸齋彭躬菴曾止山
自東巖取道圓通將登翠微峰訪魏
東房冰叔和公金精遇王老與談感
賦王老號辛研建昌某所旗較

東巖入翠微夷險路不一直路乃在險欣憚互
爭執予曰憚何其披榛越次入壁仄水無梁屢
涉復屢陟相對歎阻艱廢然幾回屐歛忽抵金
精解衣聊坐息野老解茶事傭采遂論直喋喋

自薦能令人疑失實未言與淚俱悉我南來迹
惟以日月虧備令諸艱集我家亦世官衰年五
十七從時同薙髮新喪固免憤喪君猶考妣懷
此向誰述嗟聞老者言悲心頓如棘赤紱半周
士商孫麗不億忠孝每在斯敗亡豈無責任事
力不稱用人憑胸臆卽今一反觀感愴未有極

卓發之

再見

穢園螺史

有序

石頭城清涼山之畔竹逕數轉別有
人間乃結籬爲園園貯一山類襄陽

袖石巒壑畢具其中衆花滿林可供
塵刹疑是西土盛華之祇因處處誌
之得十有六則以表蓮宗運想諸境

馭虎巖

園枕虎踞關東趾會祠部奉詔祀遜國殉節諸
臣先忠貞公少與仙游騎黑虎風雨夜歸遂祠

於園之
北偏

嘯呼懷烈士風雨歷欽巖君亦軒髻客誰能受

轡銜

靈光殿賦虎奮豐而軒髻
姚少師以留公為養虎

鶴滌

巖前幽澗瀉自山椒白鶴為淨域化
禽不欲以生命飼林梁聽其所集

鴛子每談空晏坐當沙滌忽聞鶴唳雲亦自宣

真諦

蓮旬

自滌達堂駕曲圮于水際蓮花微妙香
潔亘幾絲旬不僅如人世車輪而止

花氣偶相觸沿洄經幾旬自非蓮國裏安得一

心人

無山堂

圮盡遙望一廬窈然孤峙深岫中鍾山翠黛當
戶洲島之僻至此便欲濡足每念清泰無山輒

作山不
是山想

天意多奇嶮茲山有紀堂我看平若水雲際聽

浪浪

笠广

繞堂南嚮危樓翼然如
老翁蓑笠而釣江雪

何必棲鳥窠巖雲自成广笠裏解藏身雨絲空

激灑

夕山

廣後歷級而高雲根涵碧如海一漚而山澤無名以待
主者余生濤山浪屋間又生于潮生之夕因以名山

夜岫生寒浪浮漚貯亂山漸江潮有信欲寫入

懷間

浙名
漸江

鋤月灣

山右阜一灣如眉一荒韭耳巢繇買山而隱遂
耕而為田灌而為圃時策杖聽水聲歌帶月荷

鋤之
句

薙却人間蔓無如此一灣塵勞從岳峙只似月

光閒

呼龍解

中田與龍潭隔解登解
而呼可耕烟而種瑤草

龍性亦能馴餐花狎深解茅狗世相呼空厓落

長喟

龍池有五花樹羣龍食之
呼子先騎茅狗化為龍

寒江榭

嶮頂攬擷諸勝若謝公墩莫愁湖遠至天關繳
山雨花天印俱在懷袖惟清涼峰差高累黍春

夏之交江色翳如若木葉盡
脫則寒江一線渺在雲際

木葉漸辭柯江波照危榭彷彿暮雲開嫦娥睇

秋夜

藥草畦

榭俯深塢堪植藥草當一雨普滋千山
秀色時誰向此中領取明明祖師意

痼疾無煩療阿伽秀滿畦法華新吐萼一任白

雲迷

西域以阿伽一藥總治
諸病法華藥草喻品

茗柯坪

循畦而上地如展手茗椀未擎旗槍初茁便
如萬里故人歸來對影無埃松風響發時

烟腋結為樹遂如雲在坪葉葉光堪飲寒泉欲

與爭

劍壑復自坪左折而坂坂窮路轉自此又一山川乃壑塘貯雨後泉以此當慧劍斷愛河欲與世辭

人世艷如花從茲委諸壑墜葉自東流不用為媒妁

爛虹壑前橫一堤堤上桃花覆水水中芙蓉披畦交錯如繡帔如霞鳥如采虹之卧天

春雨深深裏浮空有霽虹却如泉石畔偃仰一英雄

螺髻菴劉伯倫言死便埋我不如中峰之活埋乃擬活埋而結菴菴以壑為屨以虹為几以鍾阜為雙髻高帝言堆螺髻于天邊即此

翔瀨鴛如岫穿雲鴈作菴金人天外落紺髮自

藍髮須彌山有青鴛伽藍佛堂如鴈形

懸鼓峰菴負西峰峰頭望落日如懸鼓韋提希以此為初諦

世界東西隔原來祇一峰遙期日落處與子得相逢

直樹林髻菴烟蘿一徑斜通直林相去一牛吼地朝雲夕月兩兩映薄梵唄唱和宿莽間此即迦文生處回首林巒又隔一境如匡廬影寺在虛無滅沒間世遂無問津者

如何鷲嶺客姓字託高林欲作凌空翮孤騫離

釜鬻梵語釋迦此云直樹林佛生此林中因以為姓

薛案諧孟後為僧名米堆山江南武進人

祇園圖和詩十六章

卓氏祇園十六區張君既各為圖而楊龍友復寫此冊張則亂頭龐服龍章鳳姿楊則雅人修士楚楚焚香掃

遺民詩九
地時也蓮居士父子題咏足千古而使予得列其間願
寶此園更寶此圖庶予得與裴迪俱不朽乎冊尾董思
翁跋曰祇園圖十六景楊龍友為無量居士作蓋盧鴻
草堂圖李公麟龍眠山莊圖流傳世間皆稱神品鴻乙
自有嵩山十志楚詞而山莊圖題詠具蘇黃門集五言
絕句頗類摩詰輞川詩伯時獨以畫名意當時必有首倡
但無傳耳無量居士於此十六景已有詩中畫而龍友
盤薄氣韻生動着意微茫滅沒間有鴻乙之蒼秀伯時
之幽邃為十六景傳神寫照無復遺恨如置身輞口椒
園鹿柴居然王裴倡和勝情信可傳也又跋曰世宗觀張
文忠祖墓圖以筆抹其一山是冬永嘉有峰夷為平陸山川
在畫史筆尖既可夷為平陸亦可從地涌出想成國土
佛語無誑秦皇驅石入東海淨名方丈擲大千不為奇
事知此則祇園不在金陵居士不必無量杜子美丹青
引云花驄却在御榻上榻前階下
還相向此冊在處是卓園化身

馭虎巖

虎踞石城在六朝何往哉不如君先人江干駕

虎來

鶴澌

鶴影夜臨澌澌鱗亦起舞老龍聽法罷欲與胎

仙語

蓮旬

君以蓮為宮鬚苗自寬廣盍觀恒沙國盡托錐

刀上

無山堂

琉璃為胸次中復現五嶽何忽自云無無無乃

正覺

笠广

生長笠澤旁夢魂在其中支雨歌箬冠吾與樵
青同

汐山

昔聞景純言凡山生于浪亦有浪同生巾裾骨
肉相

鋤月灣

唯俗不可醫為有醫俗意我自田舍翁桔槔昨
已治

呼龍嶰

潭外有龍跡瞥來或青鳥不然卽麻姑愛此爬
背爪

寒江榭

已甘入林深眼濶復如此胡不任蒙茸潑墨澄
心紙

藥草畦

有一輓轡因拾草立權喻我以命聽藥藥以命
聽雨

茗柯坪

吳越古湯社請君為署領不知是何曹但解日

茗芋

劍壑

古劍乍磨時心光一片連未諳空後性請証夢
中天

嬾虹

湘核裹黃泥風雨蒸霞色城南呼護來枕臂解
虹渴

螺髻菴

珠在女掌中舉首問螺髻卽以髻絲觀非復膏
沐氣

懸鼓峰

懸鼓無鼓音赫然示諸方此鼓不可觸觸之掌
生芒

直樹林

天公布疎林還如天絲織配色欲織妍理絲固
綢直

沈叔培

御冷浙江錢塘人

城南烏

城南南樓禿老烏歸飛啞啞引其雛仰頭看人
低哺食一顧一步鼓兩翼朝啄暮啄願早飛雌

長雄鳴各南北老
胸中意悽惻不如毛短口
黃在烏側

王鳴雷

東村廣東番禺人

古意

薄暮雙鳥來清曉鳥雙去
歎儂不如鳥欲伐庭
前樹

迮

俊

自菴河南人

迷樓晚眺

歌舞何年歇隋皇昔夜遊
一隄殘月色樹樹帶
新秋

江國茂

二如江南歙縣人

登富春江上南樓

南樓跨城郭奇峰青四面
下澄富春江江光暮
景絢我來一登臨佳氣難
恒見只此立須臾氣
象覺千變秋風催晚潮
寒雨遲早雁雲路接天
都莫使鄉書間

檢書

積書滿堂上手澤傳高曾
殷勤授兩兒風雨攢
一燈無何邁百六烽火頻
年仍山澤無完家紛
拏同秋鷹滿眼驚滄桑
散帙空擔簦雖亂毋相

遺箕裘遠相承

野鳥

朔風天外來歘然盈廣漠掃地作雷鳴樹上鳥
巢落人家屋瓦空紛紛下秋籜野鳥控地鳴
嗥何所託

蕪湖卜居

亂後餘身在攜家去故鄉行行復何之中道自
徬徨人生邁陽九僕僕鬚髮霜既卜蕪陰宅還
憐江水長得枝聊以棲慎勿賀高堂
浣花有草堂栗里有柴桑終古一逆旅千載遙

相望陶潛逸而樂杜甫勞且傷吾廬寄江滸兩
賢何可當但醉無所營于茲終徜徉

雪後同人飲旗亭

朔風吹暮雪晨起青山白寒光欺敝裘欲阻登
山屐那知客興豪羣峰指短策磁罌送醇醪寒
波出春鯽飲者亦寥寥隨意徙几席陶然幽思
來絕無塵慮迫

豆棚

豆棚高甕牖故故散清陰未達為儒術聊同學
圃心雨暘希護惜車馬免招尋佐我山厨饌野

人酒共斟

贈友

不作諸侯客孤鴻海嶠飛網羅身易脫吟嘯興
難違江月翻蘭漿荷風熏葛衣廣陵濤未涸亦
自有漁磯

邗江春漲

楊柳綠蕪城春水暗裏生人家離水近石岸與
舟平不似秋濤壯全無夜雨聲田疇疑欲合漠
漠未分明

何日山中住

何日山中住翠微闢草廬石泉容灌藥雲洞可
藏書丘壑全家老乾坤萬事虛初心如果遂雞
犬載柴車

滿家衞看桂花

南高峰畔樹上下桂花多谷口循香入叢中側
帽過秋風趨賈豎人境絕樵歌桃柳湖堤上難
教禁斧柯

虎丘懷古

艤艇陟高阜霜楓彫素秋茗香僧坐石鐘悄客
登樓臨水思吳劍何人報越仇精靈空化虎長

嘯一荒丘

毘陵道中

一望盈盈春水碧應多宿雨下山谿村花紅亂
鳴鴉鳩隴麥青深飛雉鷄賣酒布帘孤艇出打
魚絲網晚燈齊江南處處風光別紀事新詩枕
上題

宮怨

曾記入宮時儂年未十五但見舞衣更未蒙試
歌舞

咏山柴


樗櫟材原菲當春不放花折摧母太賤曾亦入
雲霞

山行

淙淙長瀑瀉晴峰雲裏青山挂白龍想像故園
戀壑似寺門不見萬株松

雨後立慈光寺前

日日看山興愈濃無聊春雨阻遊踪若非屐齒
愁苔滑此際捫蘿第幾峰



道氏詩九

五

